

# *BAHEBERU, KHAOLO EA BORARO*

 Malume hoseng hona, metsoalle. Ke monyetla ho fihla koano hoseng hona kahara tšebeletso ea Morena. 'Me re tsepile re lekanya hore e tla ba nako e kholo.

<sup>2</sup> Ke tsoa ka morao feela ho... seo re kileng ra se bitsa phaposi ea batikone, moo joale ho beiloeng lihatisi, ke ne ke ntse ke qoqa le mosetsana le 'mae ka motšeо mono, ba tsoa holimo Joliet, Illinois. Me ke nahanne kamoo ngoanana eo e leng sebeoa sa mohau oa Molimo. Bongata ba rōna rea mo tseba tikolohong ena. Ke e—e lekhoba la tahi, le lebe ka ho fetisia. 'Me ke qalile ho utloa pale ka ho hlaka hoseng hona, mohla a ne a tloha kalaneng. Morena a mo senoletse sohle se phoso le se neng se tla hлаha. Eaba o tloha kalaneng, a lla a nyakaletse hoba Molimo o mo pholositse lebitleng la e—e letaoa. 'Me eèna... Mofumahatsana e mong a mo atamela a qala a lla, a re morali oa hae, kea kholoa, ke lekhoba la lithethefatsi. 'Me lea tseba, ka mohau oa Molimo, ngoanana eo a bitsoa (kea kholoa, e le bosiung bo hlahlamang, boo Rosella, a bitsitsoeng?), eaba ngoanana eo, oa lithethefatsi, o a folisoa. 'Me eèna le mohatsae ba rera Evangelii. 'Me—'me—'me ho bona mofumahatsa ea ratehang ea kang Rosella, o holile. 'Me joale eèna, o a hlompheha, o na le e... o utloile pitso pelōng ea hae. Empa, ka ho tseba Bibele mabapi le bareri ba basali, ua bona, o tseba ntho e 'ngoe. 'Me Molimo o mo tataisetsa lichankaneng le linthong, ho paka.

<sup>3</sup> Ho a babatseha feela ho—ho—ho tseba, ho batla thato ea Molimo. Ka linako tse ling re fumana maikutlo, empa re batla ho fallisetsa maikutlo ao libakeng; ha u sa hlokomele, liabolosi o tla nka maikutlo ao a khopamisetse nthong eseles. Empa ha feela re tsepama le Bibele, re tla be re lokile, u a bona, re ntse re tsamaea ka thato ea Morena hantle.

<sup>4</sup> 'Me hape ke lumela hore—hore Rosella o tla kena masimong a boromua nqa e 'ngoe, hobane Amerika ha e batle Evangelii.

Le tseba seo. Re ka mpa ra amohela hoo, hoo, ho felile ka batho bana Anglo-Saxon. Ke phetho. Ha ho Evangelii eo Amerika e tlang ho e amohela. Oh, le ka thola mehlala e 'maloa, hang ka nako. Empa, ho latela Evangelii, ho felile. 'Me ha u khone le ho ba rerela, ha u khone ho qoqa le bona. Ba ke ke ba lumela letho. Ua bona? Ba ipoloketse mehopolo ea bona ea lihlooho tse thata, 'me ba hoamme.

'Me lintho tse tlang ho hlahlama sechaba sena ke kahlolo. E tla e fumana, hape. Ekaba ka khatello ea moruo. Ekaba ka bomo ea athomo. Ekaba ka seoa se seholo, kapa maloetse kapa ho hong, empa, e mothating oo. E tla latela. Ho tla oa likete tse atisoang ka likete.

<sup>5</sup> Maobane, re fetile, 'na le Moena Zabel, ho...le Moena Woods, re kena re tsoa tlase Kentucky, teng esale re lula matsatsi a mararo, ra feta pel'a projek ea matlo. Moena Zabel a re, "Ha ho na le..." Kea lebala. "Ha ho motho, projekeng eo, ea kenang kereke efe."

<sup>6</sup> U ka ba botsa ka eona. "Be, re na le thelebishene ea rōna. Re itšelisa ka eona." Ua bona? Ke mohopolo oa Amerika oo. Ua bona? "Re na le thelebishene. Re na le chelete e ngata. Re na le makoloi a matle, matlo a matle. Ebe Morena re mo hlokkelang? Ha re hloke Hoo." Ke mohopolo oa bona oo.

<sup>7</sup> Mohlomong borapeli le pholoso e re saletseng, le lerato, ke hara batho ba borapeli ba makhonthe. U a tseba, Bibele e itse hoo ho tla etsahala. [Phutheho e re, "Amen."—Mong.] Uh-huh. Lona babali ba Bibele, ke le utloile le hooeletsa "amen," le lona bareri morao mono. Hore, hoo ho nepahetse. Lerato le tla hlokahala hakana, matsatsing a qetelo; le tla fumanoa feela, le tla theoa hara batho bao e leng Bakhethoa ba Molimo. "Ntate o tla ema tsohela 'mè matla, le 'mè a tsohele ntate matla, le bana ba tsohele batsoali ba bona matla, le ba fapaneng ba tla tsohelana matla." 'Me lerato le tla sala feela, le tla sala hara Mokhethoa, ke Bakhethoa feela. Lentsoe "Mokhethoa" mono le tsoa ho lentsoe "Bakhethoa," batho ba Molimo ba khethiloeng.

<sup>8</sup> 'Me eare Rosella a sa mphetela pale ka phaposing, nakoana e fetileng, ke ntse ke nahanne, hoo, mohla bosiu boo, o itse ntho e 'ngoe e etsahetse. Le kamoo e buileng, ho theoha le bophelo ba hae, esale lekhoba la tahi le mahlo a lephekha. Ho sa khonahale, Alcohols Anonymous e ne e le sieo. Lingaka li se li mo tetse. Ho se letho le ka etsoang. Le kamoo, ho tloha nakoaneng eo, ho etsahetseng ntho e 'ngoe kateng.

<sup>9</sup> Joale mahlo a hae ha a sa tšoana le a mankhane. O a rateha, ke mosetsana e motle oa lilemo tse mashome a mararo a metso e meraro, 'me a ka tšoaneloa ke mashome a mabeli; ke sona feela seo Molimo A mo etselitseng sona, 'me joale o shebahala a fapane. 'Me, empa ka re, "Rosella, le pele ho motheo oa lefatše, Molimo o no o rere nakoana eo." E, monghali. Ua bona? Hantle. 'Me eitseha Billy Paul oa khale e monyenyane morao mane, moo a leng teng, a abela batho litlankana tsa thapelo bosiu boo, ha a tseba eo a mo abelang setlankana sa thapelo.

Na ha e babatsehe, Rosella?

[Khaitseli Rosella Griffith o re, "Moena Branham, kea ipotsa ebe kereke e ka rapela Molimo ho re tataisa, ho ea kamoo A bileng matla kateng."—Mong.]

Amen. Morena a u hlohonolofatse, Rosella. Ke tiile hobane re tla etsa hoo. U re kereke e rapele Molimo ho mo tataisa. Hoo, ho sala letsoho la Hae le sa fetoheng morao. Oh, hoo ho molemo haholo.

<sup>10</sup> Hoseng hona, ke phepelitsoe habohloko. E maloka le nthoana, ralimilione e leng ralimione le ralimilione-milione ea batlang ho hlahisa mona Louisville, Kentucky, ho nkahela tabernakele e jang limilione tse hlano tsa didolara. Empa ntho e 'ngoe tlase botebong ba pelō ea ka e itse, "Bea butle, uena ha u molisa." Ua bona? Ka baka leo, ke hona, chelete e etsang limilione tse hlano tsa didolara e khethetsoe hona. Joale ho tlameha ho ea 'musong, ho lefella whisky le lintho tse joalo, empa o batla ho e khethela tabernakele ea Morena. Empa ke t̄sepa e tla isoa ho mohlanka ea itseng oa Molimo ea tlang ho... le t̄sebetsong e itseng ea Molimo. Empa, limilione tse hlano tsa didolara li se li beetsoe kathoko hona joale. E nahaneng, hore e ka haha tabernakele e kakang.

U bona kamoo e shebehang e halima, Rosella? Empa ntho e teng tlase *mona* e buang e fapana. Ua bona? Ua bona? Ntho e 'ngoe tlase *mona*.

<sup>11</sup> Re kene kahara nthoana ena, tabernakele ena ea khale, ho lona baeti. Be, ekaba tulo e phatsimang tlase mona sekhutlong, ha le lemohe, seo esale batho ba batlile ho haha tulo ena ho e fetola sona. Empa re rata ka sebopeho sena. Ua bona, re e rata ka mokhoa oona. Re ne re lula holima litulo tsa khale mono, e le e-e litulo tsa khale tsa sethatong tse tsoang tabernakeleng mona, re ile ra feta moroallo ra phaphamala.

<sup>12</sup> Bibebe ea ka e robetse e butsoe ka mokhoa oo holima sefala. E ile ea manama holima siling ea khutla ka Lentsoe holima Eona, "Ke 'na Morena ea e lemileng. Ke tla e nosetsa motšeare le bosiu esere e mong a e utla letsohong la Ka." Kamoo re ileng ra soka ka sekweiti holima eona, *mona*. 'Me eaba e khutlela fatše, le litulo tsa khutlela malumong a tsona. Ba ne ba tlamehe ho li hohla feela le ho tsoelapele. Ua bona? Ua bona? Ka baka leo re e batla e le ka mokhoa oona, moo e leng batho ba tlase, sebaka se tlase, le Morena ea babatsehang. Amen.

<sup>13</sup> Joale, kajeno, re t̄soere a mang, re qala feela re kenella sereleli, u a tseba, ka mora hoba e-e lebese le nt̄soe, ho setse sereli. 'Me le hopole, lebese ke lona le hlahisang sereleli, ua tseba. E-e sereleli se bopiloe ka lebese.

<sup>14</sup> Ka baka leo esale re lutse ho ea 1, ea bo 2, 'me re qetella ho ea 3, le ho qala ka khaolo ea 4 ea Buka e khanyang ea Baheberu. 'Me, oh, lithuto tsa Buka ena! Re ka lula le Eona, temana e le 'ngoe, likhoeli tse tharo, le ho supa feela Bibebe eohle e nyalana le temana ka 'ngoe khara Bibebe. Na le kile la e nahana? Ha ho temana e le 'ngoe eo u ka e supang ka monoana, haese, eo ka mohau le ka thuso ea Moea o Halalelang, re ka e tlamahanya le Genese ho isa ho T̄senolo hantle ka Eona.

<sup>15</sup> Ha ho eso ngooloe sekotoana sa sengoloa kae-kae ho etsa joalo. Ho ea ka lipalo, le thutafatše, le ka mokhoa ofe, ha ho

Buka kahara Bibele e ngotsoeng joaloka Bibele... Ha ho buka lefatšeng, ke rialo, e ngotsoeng joaloka Bibele. Ha ho le letho. Lipalo tsa Bibele li lumellana ka kutloano e phethahileng; esita le likhaolo, le matšoao, le ntho eohle, e phethahetse. Ha ho buka e 'ngoe; u ke ke ua bala khaolo ea eona e sa leane ka boeona. Empa ha ho khohlano le e 'ngoe kahara Bibele eohle. Athe e ngotsoe ke batho ba bangata, ngata, ngata; le makholo, le makholo, le sekheo sa lilemo tse makholo. Ha ba tsebe sekotoana; e mong o E ngotse *mona*, le e mong o E ngotse *mona*, le e mong o E ngotse ka *mona*. Mohla E ne e teanngoa 'moho, E ile ea loha Bibele ea Molimo. Ha ho le e 'ngoe e hohlanang le e 'ngoe, 'me, ha ho letho, ha ho lipalo, lithutafatše. Ntho efe ea Bibele, ntho e 'ngoe le e 'ngoe, lipalo, ntho eohle e matha ka kutloano e phethahileng. Haeba e sa susumetsoa, ha ke tsebe, ebe tšusumetso keng? Ke thabile haholo ka Bibele ea khale, e bokoang.

<sup>16</sup> Ba bang ba bona ba boletse, “Na u Katolike? Protestant?”

Ka re, “Ha ke setho sa efe. Ke lumela Bibele.” Ke hantle. Ke lumela Bibele, 'me ke thabetse ha re fuoe tokoloho ea ho E rera sechabeng sena. Oh, E a babatseha.

<sup>17</sup> Joale re tlil'o E hlahloba. 'Me joale re tla phetla Bukeng ea Baheberu le ho qala ka khaolo ea 3. Athe re qeteletse ka temana ea 15. 'Me joale lona bohle...

<sup>18</sup> Ke bone motho ea elelloang, nakoana ena, ha ke thonaka ligalase tsa ka tse balang. Hase kahobane mahlo a ka a le mabe, empa ke fetile lilemo tse mashome a mane. Nka khona ho e bala, hantle *mona*, ka tloaelo feela, empa ke khona ho e bala hantle ho feta ka ligalase. 'Me ba nketselitse ligalase tsa ho bala tseo ke batlang ho li sebelisa, kaha nka bala hantle le kapejana. Ke li nketsese morero oo. Joale kahara e...

<sup>19</sup> Pele, re batla motheo o seng mokae, kaha baeti ba ka ba teng hara rōna, ba sa fumanang karolo ea pele ea Buka ea Baheberu.

<sup>20</sup> Na ke uena Mof. Cox, ea lutseng mona ntlheng? Be, ke hlile ke thabetse ho 'mona, pejana feela ke qala, joaloka bopaki ba mohau oa Molimo. Mosali eo mofetše o nong o ej a sefahleho sa hae ke enoa. Ke 'mè oa Khaitseli Woods. 'Me ke ne ke le Michigan le Gene le Leo, le bao, ke ntse ke hatisa. 'Me tseleng e khutlelang hae, mohatsa ka a letsa, kapa ka mo letsetsa. A re, “Rapella Mof. Cox hang, 'mè oa Mof. Woods, hobane mofetše o ntse o ej a sefahleho sa hae.” O se o kene lephakong la leihlo oa theohela lesapong, hantle lehlakoreng la sefahleho sa hae, o ntse o hasana. Ngaka e itseng e entse ho hong, ea mpa ea o mpefatsa, ea o qhalanya feela; e ile ea o noka ka moriana o itseng.

<sup>21</sup> Eaba ba mo tlisa ba etsoa tlase Campbellsville, Kentucky, ho ea fihla... kapa, kea kholoa, Acton, Kentucky, ho fihla koana—koana Louisville, ho alashoa.

<sup>22</sup> 'Me eaba Mof. Woods, khetlo la pele leo nkileng ka 'mona a sithabetse. Hobane, ehlide, ke mama oa hae—hae—hae, 'me ehlide o tla ikutloa a hlabehe. Ho kena phaposing le ho mo rapella, ka tšepo e reng Molimo o boletse A tla arabela thapelo. 'Me matsatsi a 'maloa, keha a tsoile. 'Me ke eo moo a lutseng joale. Ka mohau o hlollang feela, kamoo A mo sebelelitseng kateng.

<sup>23</sup> Na u ka ema? Ha ke batle ho ho u fetola e—e—e pontšeng . . . Ke kae, mofetše o no o larile hokae? Ka—ka lehlakoreng la sefahleho, ua bona mono, ka lehlakoreng *lane* la sefahleho sa hae, tlasana ha u pota ka *mona*, ho fihla masapong a hae a marama, le ho nyolohela leihlong la hae. 'Me eaba Molimo o a mo folisa. Na ha A babatsehe? [Phutheho e re, "Amen."—Mong.]

<sup>24</sup> Ba bakae ba neng ba le koano Sontaha se fetileng ba boneng se entsoeng ke Morena ka pono? Monna, oa seritsa a bile a foufetse, o ne a lutse hantle mona setulong sa bakuli. 'Me ntho ea nthonkha ha monna ea lutseng mona a re, "Moena Branham . . ." Kea kholoa e ne e le moena enoa hantle mona. Ha thoe, "Le 'na etsetsa mohatsa ka joalo." Mohatsae le eèna ke seritsa. Pelō ea ka ea qhibiliha feela. Eka nka . . . Nka nehela tsohle lefatšeng hola nka khona, empa ha se . . . hase ka matla a ka. Empa ke ka matla a ka le ka matla a lona, ho rapela Molimo ho etsa hoo. Mohatsae ke seritsa, letsoho le shoele, leoto le shoele, eka ho joalo. 'Me monna enoa o ne a mpefetse ho mo feta, hoba o khona ho ema le ho tsamaea nakoana, empa monna enoa o ne a sa khone le ho etsa hoo. 'Me eèna . . . Boko, mothapo o moholo oa tekano o ne o putlame. Ba ha Mayo, le ba bang, ba mo tetse. 'Me Katolike keha e mo rometse mona, ngaka ea Mokatolike; etsoe moshanyana oa hae e le moprista mane Saint Meinrad's tlase Jasper, Indiana. Empa ke ho beha majoe a motheo a tsoseletso e tla latela, tlase mono.

<sup>25</sup> 'Me eitseha a ema, a re, "Empa ha ke khone . . ." A sheba, ho re, "E, nka khona." A hopotse a sa khone ho bona, u a tseba. Eaba o a lelala, 'me ha etsahala hore a phahamise hlooho ea hae, 'me keha a tsamaea a bile a bona; a tsamaea a theoha ka mola oo oa litulo, ka boeèna. 'Me e ne e le Presbyterians. E ne e le mochesehehi oa thuto. 'Me le bua . . . Le nahana batho ba Pentecostal kapa Holiness e le bona feela ba ka hooeletsang; le fositse. Ba hliile ba hooeletsa ha ba bona ho etsoa ntho e joalo; ba kopelana 'me ba hooeletsa. Ho tsoela kantle hantle le ho theoha ka litepisi, ho sutumetsoa setulo sa hae sa bakuli; a tsamaea, methapo ea hlooho ea hae ea tekano e fapanie. E nahanceng. Ho tsamaea joalokaha 'na le uena re ka tsamaea. Oh, O a babatseha.

<sup>26</sup> Joale, Pauluse o ngotse Buka ea Baheberu. 'Me mongolong oona oa Baheberu, o Le ngotse. 'Me le pele A ngola Libuka tsena . . . Rea fumana joale. Rea tsamaea . . . Sena ke sehlopha sa sekolo sa Sontaha, 'me ke tla leka ho sheba ke se nke nako

e telele. 'Me re ntano tšoara litšebeletso, re tsoelapele ka tsona bosiung bona, ha Morena a ratile. Joale, Bukeng ea Baheberu le Liepistoleng tse ling tsohle tsa Pauluse... .

<sup>27</sup> Pauluse e ne e le mang? E ne e le Moheberu ea tiisetsang, moithuti, le moruti e moholo oa Testamente ea Khale. 'Me o ne a rutiloe ke e mong oa banna ba khabane ba letsatsi la hae. Motoh a ke a mpolelle lebitso la hae. Gamaliele, e mong oa mesuhe e meholohali ea letsatsi la hae. 'Me Pauluse o kile a lula maotong a Gamaliele.

<sup>28</sup> Ntho e teng mabapi le eona... moo u kenang teng, kereke eo u e tsamaeang, le moruti ea u rutang. Na le ne le tseba hoo? Eona, e sebetsa ho hong. Re tlameha ho batlana le ho khabane ka ho fetisa hoo re ka ho fumanang, ka hona re fumana ho khabane ka ho fetisa; e seng kahobane ho le monate le ntho tse joalo, empa ke thuto ea makhonthe ea Bibele.

<sup>29</sup> Shebang, mohla Iseraile e ne e kena lehoatateng ka mabotho a eona, 'me ba tla tsamaea leeto la matsatsi a supileng, eaba ba felloa ke metsi. 'Me ba se ba tla timela, ba itse, "Oh, hola re na le moporofeta haufi!"

<sup>30</sup> 'Me e mong oa bona a re, "Re na le e mong tlase mona, Elisha. O ne a tšella matsoho a Elia metsi." Ana le bona bomphato ba hae? Ka mantsoe a mang, "Elisha ea neng a tšella Elia metsi ke enoa. Lentsoe la Morena le ahile ho eèna." Lea e tšoara? O rutiloe hantle. 'Me a re, "Ke enoa. Ha re theoheng re mo botse, hoba moruti oa hae e ne e le Elia, 'me sesiu sa thuto ea Elia se kahare ho eèna." Lea bona kamoo hoo ho etsang phapang e kholo? Ehlide. Re batla ho rutoa.

<sup>31</sup> Ka hona, Pauluse keha a bolokile thuto ea Gamaliele. 'Me Gamaliele e le monna e moholo ea kileng a etsa khetho, kaha le eèna e ne e le moithuti, mohla boitšoaro bona ba kereke ea ho qala bo ne bo qala, o ne a re, "Re se e isetse matsoho a rôna, baena. Haeba e se ea Molimo, e tla thisa, le hona. Empa haele ea Molimo, 'me re e loantsa, re tla iphihlela re loantsa Molimo." Ua bona, o ne a tšoere tse ling tsa lithuto tse lokileng.

<sup>32</sup> Pauluse o tsoile tlasa monna enoa, 'me o tsebile hobane Pauluse e ne e le moruti e moholo. Ka hona, tsatsi le leng, ka botšepeli pelöng, a ntse a hlorisa Kereke, a theoha ho ea ba tlama.

<sup>33</sup> Joale ha re tšoaraneng le lekhathé le seng le kae la Pauluse, re sa haha motheo oa rôna.

<sup>34</sup> Mohla Judase a ne a tlola, tlolong, ka ho rata chelete le boikhantšo joa bophelo, o ne a ngalohe mohau eaba o ikela sebakeng sa hae. Eaba barutuo ba re, "Eka khona ba be leshome le metso e 'meli." 'Me kereke, ka boholo ba eona, ho supa seo kereke e leng sona; ka boholo ba eona bohole le matla a eona oohle, e sa haelloa ka limilione tsa limaele, bokhabaneng ba eona. Ba itse, "Re tlameha ho batla, e mong hara rôna, ho

tlatsa sebaka sa hae.” ’Me ba khetha, ka ho laola ka lotho, Matthiase. Matthease, kea kholoa, kapa Matthiase. Matthiase, kea kholoa ke eëna. ’Me mohla ba ne ba mo khetha ba mo holeha le ba leshome le metso e ’meli, le ba leshome le motso, ho etsa ba leshome le metso e ’meli, ha a ka a etsa ntho le e ’ngoe. Lebitso la hae le bitsoa hang mohlang oo ka hara Mangolo. E ne e le khetho ea kereke eo.

<sup>35</sup> Joale, ba nahanne, “Ke lejantlelemane.” Ntle le pelaelo. “Ke monna ea babatsehang. Ke moithuti. O bohlajana. O rutehile. Ke motho ea khabane. O tla tlatsa setulo sa Judase e be e mong oa rôna.”

<sup>36</sup> Empa, lea tseba, Molimo nako tse ling o etsa tse ling tsa e...ho latela mohopolo oa rôna, tse ling tsa likhetho tse sethoto. Joale, Molimo o no o bone Mojuda ea porometseng nko, a tloketsoe ke mabifi ana, a ntse a nyekoetsa molomo lephakong, “Ke tla theoha, ke tlame e mong le e mong oa bona. Ke tla—ke tla ba hlahlela chankaneng. Ke tla etsa sena.” E ne e le khetho ea Molimo.

Ba bang ba khethile moithuti le modiplomate. Ke khetho ea kereke eo.

<sup>37</sup> Ua bona, ha u tsebe motho eo ea aletareng. Ha tsebe eo u ntseng u mo pakela, chankaneng kapa hohle. E ka ka seloani, se ubuselang litsibe, se kalotseng mahlo, ’me, empa ha u mo tsebe. Laola ka lotho ea hao feela, ke phetho, mo fe Lentsoe. Molimo o a ikhethela.

<sup>38</sup> ’Me Molimo o khetha Mojude enoa ea mabifi-bifi, kapa o mo khethile, ke rialo. Tseleng ea hae e theohang, “Ke tla theoha ke ba tšoare. Ke tla—ke tla ba bontša seo nka se etsang,” eaba Molimo o mo ratlanya fatše.

Molimo o itse, “Ke khetho ea ka eo, eona eo.”

<sup>39</sup> Na e ke ke ea eba bothoto, ho kereke? “Khele, o hloris kereke. Ke monna oa nama.” Empa Molimo o tsebile se kahara monna. Le bona seo ke se bolelang?

<sup>40</sup> Ka baka leo, Pauluse o fumane boiphihlelo. Ba bakae ba lumelang hobane boiphihlelo bo tlisoa ke tšokoloho? Ehlile. Haeba e sa etsa hoo, nka belaela tšokoloho eo. Tšokoloho e hlahisa boiphihlelo. ’Me u ke ke ua e balla letho joale. Ka linako tse ling ekaba ho hooletsa. Ka linako tse ling ekaba ho bua ka lipuo. Ka linako tse ling ekaba ho lla. Ka linako tse ling ekaba ho feheloa. Ha u tsebe seo e leng sona, ka hona u se leke ho e balla letho. Hobane, e mong le e mong oa lona o pakiloe a fositse mono, lona Methodists, le lona Baptists, le lona Nazarenes, le Pentecostals.

<sup>41</sup> Ke bone batho ba hooletsang ka thata kamoo ba ka hooletsang, ba ntano utsoa gauta ea leino la hao, ha ba khona. E, monghali. Ke bone batho ba buang ka lipuo joalokaha ho

tšeloa linaoa holima lekoko le ommeng la khomo, 'me—'me ho bua 'nete, a ntse a poroma koae ka lehlakore le leng la molomo, 'me a ka u poma qoqotho ha a khona. Ke hantle. Ka baka leo lintho tseo ha li a... Ha ho bopaki boo o ka e pakang ka bona, haese ka bophelo boo motho a bo phelang. "Le tla ba tseba, ka tholoana ea bona."

<sup>42</sup> Ka baka leo, ntho eohle e itšetlehile ho Molimo. O etsa khetho. Ke eena ea teanyang lintho hammoho, 'me ehlile ho joalo. Ka baka leo haeba bophelo ba hao bo bapa le litholoana tsa Bibele, u tšoere mohopol o motle o iphotlileng. Haeba moea oa hao o pakelana le Moea oa Hae, hore le bara le barali ba Molimo, o a... Bokhopo bohole ba khale bo foforehile, 'me tsohle li nchafetse, 'me u phela ka lerato, 'me u na le khotso, le mohau, le tse joalo, u ntse u atamela 'Muso. Hobane, Bophelo bo kahare ho uena bo hlahisa bophelo ba mofuta oo. Ua bona?

<sup>43</sup> Ha u ka re, "Oh, alleluia, ke buile ka lipuo. Alleluia!" Hoo ha ho bolele letho. Ha e bolele letho joalokaha u ka tsoa oa letsa lehlaso ka katara kapa ho hong. Ha e bolele ntho le e 'ngoe. Leha u buile ka lipuo, leha u hooeletitse, le ho mathela holimo-le-tlase pakeng tsa litulo, u tšoloha likeli eka u ne u ebola lieie, hoo ha ho bolele letho, le ntho le e 'ngoe, haese ha bophelo boo ba letsatsi ka leng bo e tšehtesa ka tšoanelo feela, ho tsepama le Eona.

<sup>44</sup> Joale, ha u etsa lintho tseo, u li kopanya le bophelo boo, "amen," hoo, ho itoketse. Ke botle. Empa ha u khona ho etsa lintho tseo bophelo boo bo le sieo.

<sup>45</sup> Ka hona, ha ho litlatse, bopaki ha bo eo linthong tseo. Jesu o itse, "Le tla ba tseba, ka tholoana ea bona." 'Me tholoana ea Moea hase ho bua ka lipuo. Hase tholoana ea Moea eo. Ho hooeletsa hase tholoana ea Moea. Ho lla hase tholoana ea Moea. Empa, lerato, thabo, khotso, mamello, molemo, mosa, tumelo, bonolo, le boitšoaro, ke tsona litholoana tsa Moea. Ua bona? Ke sona seo litholoana tsa Moea li leng sona. Ho lokile.

<sup>46</sup> Joale, lebaka leo re fumanang lintho tsena, ba rata ho bopa mekhatlo, u a bona. "Be, re tla e etsa. Ho bokoe Molimo, bohole ba lumelang joaleka *rōna*, re tla nka tsela *ena*. Bohle ba lumelang joaleka *rōna*, re tla nka tsela *ena*." Empa Molimo o batla bohole ba nkang tsela *Ena*, ba nyolohang hantle.

<sup>47</sup> Joale, Pauluse, hoba a fumane boiphihlelo bona, eaba o bo hopola e le boiphihlelo bo khabane. Joale, ho tla joang... Ha re—ha re—ha re qhautseng boiphihlelo boo nakoana. Pauluse leetong la hae la Damaseka, ho tlama batho ba bang tlase mono, kaha Evangeli e ne e hasitsoe tlase mono. *Evangeli* e bolela "litaba tse molemo." 'Me eaba ba hasana tlase mono, 'me ha tsoha batho ba bangata, ba tletse lerato, le thabo, 'me ba rata Morena Jesu. 'Me keha E hasakane nqa eo. Ka hona, Pauluse a fuoa mangolo a 'maloa a tsoang ho Moprista e Moholo. A re, "Ke tla theoha, 'me ke tla tlama, e mong le e mong."

<sup>48</sup> Eaba o nka moifonyana oa balebeli, balebeli ba tempele, masole, a theosa ka tsela. Eare ba sa hoanta ba theoha ka tsela, le eèna a tsebile seo a tlang ho se etsa, hang feela, ntho ea etsahala. Hang feela, ka pela hae ha hlaha Leseli le leholo. Leseli le leholo, joale, Le ne le chabile le tšoana le letsatsi. Ntho eo ke mohlolo ho hlaha. Leseli la chaba hoo a bileng feela a . . . Mahlo a hae a ba a foufala, mohlomong. Eaba o oela fatše. 'Me o—o robetse fatše, 'me o a lelala.

<sup>49</sup> O ne a teetsoe hare ke banna ba ka bang leshome kapa leshome le metso e mehlano. Ana o teng monna ea boneng Leseli leo? Che, monghali. Ke Pauluse ea Le boneng. Le ne le sa etsetsoa bona ho Le bona. Ka hona, batho ba bang ba ka bona lintho, athe, ba bang ha ba khone. Ua bona? Ka hona, Pauluse o bone Leseli leo, La ba la mo foufatsa. Keha a sa bone, matsatsi a 'maloa, ho eèna E ne e le ntho ea mannete. 'Me a sitoa ho bona nakoana . . .

Haisa-isa, mohla a ne a ngola mangolo, mahlo a hae keha a mo hllopha hampe, a ba a ngola ka mongolo o moholo. A re, "Haele moo ke le ngoletse ka mongolo o moholo." O ne a bona ka thata.

<sup>50</sup> O ne a le chankaneng, eaba o kopa Morena ho mo folisa. Eaba o Mo kopa hararo. Empa eaba Morena o reng? "Mohau oa ka o lekane, Pauluse."

<sup>51</sup> Pauluse a re, "Ka baka leo ke tla ithorisa mefokolong ea ka." Hobane, o itse, "Esere ka iphahamisa ho tlolisa ka baka la Tšenolo, ke neiloe lengosa la liabolosi, phatsa e nameng ea ka, e nkoahlelang." O ne a fola nakoana, ebe li boela li tsoha.

Ho *oahlela* ho bolela "petso ka mora petso." Joaloka sekepe holima leoatle, u a tseba, māqhubu a le oahlela, ua bona, petso ka mora petso.

'Me o ne a khona, a ntlaufale, e boele e mo tšoare hape; ebe o a ntlaufala, e mo tšoare hape. A re, "Morena, molato keng, hobaneng U sa e tlose ho 'na?"

<sup>52</sup> A re, "Mohau oa Ka o lekane, Pauluse. Tsoelapele feela." E ne e lula e . . .

<sup>53</sup> A re, "Joale, holane—holane ke phethahile feela, 'me tsohle li phethahetse," ho re, "leetong la ka ha ke tsamaea, oh, ke ne ke tla ithorisa ke re, 'Lea bona, ha ho phoso ho 'na. Morena o a mpaballa, moena. Alleluia!" Ebe u apareloa ke toka ea motho.

<sup>54</sup> Eka khona Molimo a u nee nthoana, hang ka nako, ho u kokobetsa nakoana, u a tseba. Ke hantle. Ho Mo lemoha e le Mampoli. Oh, na ha A babatsehe? E, monghali, ke thoriso feela!

<sup>55</sup> Ka baka leo eèna, Pauluse, ka hona, hoba a hlaheloe ke boiphihlelo bo boholo bona . . .

<sup>56</sup> Joale, hola ebile motho e mong kajeno, ba ka be ba itse, “Oh, ho bokoe Molimo, alleluia. Moshaana, Morena o nketselitse selo! Ho tlottisoe Molimo!” Empa e seng Pauluse; e ne e le moithuti oa Bibebe.

<sup>57</sup> Boiphihlelo boo bo tlameha ho nyalana le Lentsoe la Molimo. E, monghali. Haeba bo sa hokana le Bibebe ka bottlalo... E seng ho sheba ka *moma* feela, ho re, “Oh, e, ke ena hantle mona. Ho bokoe Molimo, ke O fumane.” Huh-huh. Molimo ha o O abe joalo.

<sup>58</sup> Eka khona ebe Bibebe eohle, kaofela ha Eona. Hobane, u ka khona... Bomosalumele ba sebelisa Bibebe ena ho ngagisana ka eona. Empa ba tla nka Lengoloana *mona*, ho phetla ka mona ba tšoare le leng *mona*, ho leka ho a tlamahanya, athe ke lihlooho tse peli tse furalaneng, ka bottlalo. Ka baka leo, u tlameha ho bapisa Lengolo ka Lengolo.

<sup>59</sup> Joaloka Esaia ha a boletse, khaolong ea 28, “Ke mola holima mola, mola holima mola; hanyenyane mona, mono hanyenyane.” “Le tiisetse tse molemo.” Ua bona, O tla ka tsela eo: mola holima mola, Lentsoe holima Lentsoe, Lengolo holima Lengolo. Ntho eohle e tlameha ho momahana ’moho. Ke kahoo, ke hopolang, hore lithutong tsena tse kang tseo re li tšoereng joale, ke nthohali ho kereke, hobane e ba beha moo Mangolo oohle a tlamahanang ’moho. ’Me boiphihlelo ba rōna bo tlameha ho momahana le Lengolo. Oh, ke ena moo e leng teng! Ha e sa etse, e tla be e fosahetse.

<sup>60</sup> ’Me esale ke tsamaea lilemo, ke sa tsebe seo Leseli leo le otgileng Pauluse la mo lahlela fatše le neng le le sona. Athe, lefatše le kantle, Mangolo... Batho, bareri ba ile ba leka ho mpolella, “Ke la liabolosi. Hobaneng, u tla fetoha senohe-ramahlohonolo. U tla fetoha moloi. U ke ua hlophana le ntho Eo, Billy. Phoso e teng nthong Eo. U se ke ua etsa hoo, moshanyana. E phoso. Ke liabolosi. Be, moshanyana, o tla fetoha ’muelli ea pala oa bafu. U tla ba moloi ha u ka etsa hoo. Oh, ke ntho ea liabolosi. Ha—ha e a loka.” Empa eitshe ha... Ke ne ke sa batle ho e rera.

<sup>61</sup> Empa joaloka tseleng ea Damaseka, Pauluse o ne a sa batle ho rera ntho eo, hofihlela a fumane haeba e lokile kapa che. Ka baka leo o theohela Arabia lilemo tse tharo, ’me o batlisisa Lengolo. Ah! Eitseha a etsoa, a re, “Joale le ka leka ho ntlhohloraa eona.”

<sup>62</sup> O tsebile a tlameha ho tjamelana le Bafarisi. O ne a tlameha ho tjamelana le Basadusi. A tlameha ho tjamelana le lefatše, le lefatše la Balichaba. ’Me eaba Pauluse ke hona, Bibebe ena e ngotsoe, Buka ena ea Baheberu, e ngoletsoe morero oo. O ntse a tsukutla Baheberu bao, ’me o nka Testamente ea Khale a E bontša mona kahara Testamente e Ncha. “Enoa ke Molimo,” o boletse, “ke ena eohle

holima—holima baporofeta le ntho eohle.” E qala morao mona tšimolohong, khaolo ea 1 eo re e balieng, “Molimo mehleng ea khale, motšeо koana nakong ea khele, ka mekhoa e mengata, o buile le bontata ka baporofeta.” Molimo o no o tlisa molaetsa oa Oona joalo, o ne o lekoa ka Urime Thammime. “Empa letsatsing lena o buile le rōna ka Mora oa Oona, Kreste Jesu,” ho fetisoa hlahlobobong ea Bibele ea Hae. Ke moo he.

<sup>63</sup> Ka baka leo boiphihlelo bona boo lefatše le bo reileng, “Oh, ke ntho ea kelello. Hobaneng, ha ho motho . . .” Mohla Lengeloi leo le ne le hлаha, Leseli leo tlase mona holima noka, mohla ke ne ke rera tsoseletso ea ka ea pele mona sekhutlong, re ile ra kolobetsa batho bao bohle . . . Kea khola, Moena Fleeman, mohlomong o ne o le kahara . . . Ha ke tseba haeba u ne u le teng kapa che. Ba neng ba le teng ba bakae mohla e—mohla Leseli le chabang holima noka? Ana o teng mokaubere mona? E, ba bang ba bona. Mohla Le hlahang mona holima noka.

<sup>64</sup> ’Me ba itse, “E ne e le sethetsa-mahlo feela.” Bongata ba rōna re ne re eme, re Le shebile, ’me ke lena Le theoha. ’Me eaba lilemo hamorao, Molimo o Le kholisa ka leihlo la mochini oa khamera. Ke ’nete.

<sup>65</sup> “Be, na ebe ke—na ebe e tšomo e itseng? Na ebe ke ntho eo—eo . . .” Che, monghali. Re e nka hantle mona kahara Bibele ’me re le bontša eona. Ke Morena Jesu eèna eo. O sebetsa ka ho tšoana. Ketso ea Hae e a tšoana. Matla a Hae a tšoana.

<sup>66</sup> Shebang, Sontaha se fetileng, mona. Koana, mohla ke robetseng moalang oa ka, ke eso bone monna eo bophelong baka. Ho tsoa le ho re, “Monna o teng tabernakeleng, ’me o moputsoa, hlooho ea hae e ntšo, o a pulufala. O foufetse, ha a khone ho tsamaea. O holima setulo sa bakuli. O rometsoe ke monna ea hlooho e ntšo; ngaka, Ngk. Ackerman, monna ea hlooho e ntšo, monna oa Katolike. O rometse monna, o lutse hantle mona. ’Me HO RIALO MORENA, a ema hantle, a tsoa a tsamaea a boetse a bona le ntho eohle. Hoo ho entsoe keng? Lona Lengeloi leo le teng mona. Lona Le otgileng Pauluse la mo lahlela fatše, tseleng e theohelang Damaseka, le phela kahara Kereke ea Hae le batho ba Hae kajeno. Ke Lengolo le bapang le Lengolo. E tlamehile joalo.

Oh, re fumana *bafoto*. Re tla kena nthong eo, ka morao ho nakoana.

<sup>67</sup> Oh, re emetsoe ke ntho e tebileng ka pel’ a rōna, haeba re ka kena ho eona, kajeno le bosius bona. Joale metsi a tebileng a qala a hлаha. Moo u . . .

<sup>68</sup> U a tseba, enere ke sa le moshanyana, ke ne ke tloaetsa ho etela letšana ka morao, ’me ke kene koo. ’Me rōna bohle bashanyana re kene, re hlobotse; bathoana, nka re ba lilemo tse tšeletseng, tse supileng. ’Me rōna . . . Metsi a batla a tebile

*hakaalo.* E batla e le seretse sa likolobe ho ipitika feela. 'Me mono ke beile lebokose la maiketssetso. Ke itšupe kamoo nka qoelang; ebe ke khama nko ea ka, ke betse leqhamu, ke etsa *joalo*. Ebe mpa ea ka e otla seretse, u a tseba, ebe se hafatseha ka mokhoa oo. Ka tloha ka ea bolella ntate kamoo ke tsebang ho sesa.

<sup>69</sup> Eaba tsatsi le leng o nkuka a nkisa mono. A re, "Ke batla ho u bona u sesa." Ka qhoma mono, ua tseba; ka hlobola liaparo tsa ka, hara moferonyana oa litsie; eaba ke matha, ke lukela metsing. Ke ne ke hafatsa, seretse se fofela ka mahohle. Eaba Pop o lutse mono holima lebopo. A lula mono a nchebellala metsotso e 'maloa. Ho re, "Tsoa khatamping eo ea metsi, u tsamaee u hlapo, u khutlele hae." U bona?

<sup>70</sup> Be, ho batla ho itšoanelaa, ka rōna ba ipitsang Bakreste. Re khasa seretseng. Ke hantle. Ha feela u ankoriloe, "Ke Methodist. Ke Pentecostal. Ke Presbeterian. Ke amohetse kholiso; ke O fumane." U ntse u khasa seretseng.

<sup>71</sup> Tsatsi le leng ha ke tsamaea le malome. Ke sa phetse ho 'molella . . . A batla a le leshome le metso e mehlano, lilemo tse leshome le metso e tšeletseng. Re ne re le nokeng. Ka re, "Malome Lark, ke tseba ho sesa." 'Me ke ne ke lutse motšeо ho mokoroana, ua tseba, ka ikutloa monate 'me ke bolokehile. Eaba o tšoara lesokoana a ntšutumeletsa koana, metsing a botebo ba maoto a leshome. Keha ho fapane lekhatheng leo; ho qaputsa hohle, le ho hooeletsa, hoo u kileng oa ho utloa bophelong ba hao.

<sup>72</sup> E re u sutumeletsoe kantle tsatsi le leng, u mpe u tsebe moo u emeng teng. E, mongali. Haeba u Mo tseba, u mpe u Mo tsebe ka mannete. Ke hantle.

Empa joale re kena metsing a tebileng, metsing a tebileng, moo u tla noela haeba u—haeba u sa koena, u se Mokreste ea nontsitsoeng.

<sup>73</sup> Lemohang Lentsoe. Pauluse, pele a fumana hoo. O khutletse morao ho Testamente ea Khale, eaba o fumana sena. A bona boiphihlelo boo ba hae, e le bonneta. "Joale ebe Hoo ho ntahletseng fatše keng?"

<sup>74</sup> E ne e le Leseli, Leseli le leholo le emeng mono, le phatsima joaloka letsatsi, le eme ka pela sefahleho sa hae. A re, "Saule, Saule, u Ntlhorisetsang na?"

<sup>75</sup> A re, "Morena, U mang eo ke mo hlorisang?"

<sup>76</sup> A re, "Ke 'na Jesu."

<sup>77</sup> "Ke itse E ne e le e—e monna, ea letsoho le mehoabali, leo ba le tlalehang le hlaha likopanong joale, ka matsoho a Hae a mehoabali ea lipekere le hloooho ea Hae." Che, che; ha se 'mele oo, ha se kahara 'mele oo. Ua bona? Hona joale Ke Leseli. Saule . . .

<sup>78</sup> Mohla A ne a le holima lefatše mona, O itse, "Ke tsoa ho Molimo. Ke khutlela ho Molimo."

<sup>79</sup> E ne e le Lengeloi le eteletseng Bana ba Israele ka Leseli lena, hara lehoatata. O ile a boela a khutlela Leseling leo. 'Me Pauluse o Le bone, ho tsoa kahara Testamente ea Khale. O itse, "Ke 'na Jesu, Lengeloi la Selekane."

<sup>80</sup> 'Me O fetohile nama, ho re lopolla. "Ka ho se apare sebopeho sa Mangeloi," rea fumana likhaolong tse fetileng, re ntse re batlisisa. "Ha A ka a apara semelo sa Mangeloi, empa e ne e le Peō ea Abrahama," hore A tle a tsejoe, batho ba tle ba *bone Molimo*. Amen.

Joale O re, "Ke tla boela ke khutla nthong Eo."

<sup>81</sup> 'Me eitseha Pauluse a bona Hoo, o itse, "Ehlile, e ne e le Eèna. E ne e le Eèna."

<sup>82</sup> Petrose o kile a hlahela ke boiphihlelo bosiu bo bong a sa rapela. Lona Leseli leo le kene moahong, la bula menyako ka pela hae, a kena literateng. 'Me Petrose a hopola a ntse a lora; a hlide a tlotsitsoe. Ha a tseba se hlahileng. O itse, "Na ke sa tsoa tsoha? Empa ke 'na enoa ke kantle seterateng."

<sup>83</sup> Eaba o theohela tlung ha Johanne Mareka. 'Me monyako oa buloa ke mosetsana, mofumahatsana ea itseng mono, a le tšebeletsong ea thapelo. Motho o ne a kokota monyako. Eaba monyako o a buloa. "Oh," a rialo, "Petrose ke enoa hona joale. Athé le ntse le mo rapella ho tsoa teronkong. Morena o mo loanetse."

<sup>84</sup> "Oh," ba rialo, tsoela pele."

"Oho Morena, mo loanele!"

<sup>85</sup> "Khele," a re, "o eme monyako, o ntse a kokota."

Petrose a 'na a tobola, "Mpule leng."

<sup>86</sup> "Oh," a re, "ke Petrose." Mehleng eo, le joale ba sa ntse ba sebetsa joalo, lehlafi le huloang. Mona ho na le sekoahelo se se nyenyane, u a se phahamisa ebe u sheba kantle, ua bona. Le pele u lumella moeti oa hao ho kena, u tlameha ho tseba ea kokotang monyako oa hao. Kaha, linokoane li ne li atile; ha u ka bula monyako, ba tla u bolaea.

<sup>87</sup> Ka baka leo, ba bula monyako. A re, "Ke Petrose."

<sup>88</sup> Ba re, "Oh! Oh, khili, o se a shoele. Ke lengeloi la hae le emeng mono. Ua bona? U se a kene 'meleng oa hae o tlotsitsoeng, u a tseba, theofani eo."

<sup>89</sup> Le sa hopola kamoo re ileng ra tšoarana le Eona, e le Taemane e kholo, kamoo E halimisitseng Leseli, le kamoo Le khutletseng hape mono? Eona... "Efela mohla tabernakele ena ea lefatše e senyehang, re na le e re emetseng."

'Me ba hopotse Petrose a se a shoele, 'mele ona oa khale o se o oetse fatše, 'me ba se ba tla mo epela matsatsing a 'maloa. "O se a kene kahara lengeloi la hae, kapa oa hae o glori-..." Ha se 'mele o tlotsitsoeng, empa kahara theofani ea hae, 'mele o

seng o lokisitsoe. Ha o khone ho tsukutla letsoho la hao. Ha o na matsoho ao o ka a tsukutlang, ka mokhoa oo, empa oeme ka setšoano sa motho. “O theohile, ’me o ntse o kokota monyako.”

<sup>90</sup> A re, “Che. Ke Petrose. Oeme mona.” A bula monyako a kena kahare. Ke eo moo a na a le teng. Joale, Leseli lena le ne le lokolotse Petrose.

<sup>91</sup> Joale, ka mokhoa oo ea ho qala... Pauluse eo, kahara Kereke ea ho qala, o bone Leseli la Molimo le chabela Pauluse, Hoo ho boetse ho theohile. Joale, batho ba ka bua ntho efe feela, hoo ha ho e nèpahatse. Empa efèla ha Molimo o paka taba efe, mosebetsi oa Eona o a È paka. Eaba, Le pakoa ke khamera. ’Me sohle seo re... seo Morena a se entseng, se nèpahalitsoe ka botlalo, Se kholisitsoe e le Molimo ka ho se tlaile, ka Mangolo, ka khato ea Sona, ka boiphihlelo. Empa ba hana ho mamela.

<sup>92</sup> Shebang mona kahara tabernakele ena. Joale, le hopole, le tseba sena. Ha re labalabele matšoole. Ha re na sebaka sa ho ba boloka, le hona. Empa, shebang. Kopano ea mokhalo oona, ka nako ha re phuthehela morero ona, e tlameha ho hohela Falls Cities. Empa ba shoele. Ba hlile ba shoele. Ba na le mahlo empa ha ba bone.

U re, uena, “Khele, Moena Branham, hobaneng ba sa bonane le ngaka ho hlophisa mahlo a bona?” Ha e ka ke ea khona ho lokisa pono ea mofuta oo.

<sup>93</sup> Jesu o boletse, “Holane le Ntsebile, le ka be le tsebile letsatsi la Ka.” A re, “Lona Bafarisi ba lifofu. Le khona ho lemoha maemo a maholimo, haele lipontšo tsa nako, ha le li lemohe.”

<sup>94</sup> Ana taba eo e feta holima lihlooho tsa lona? Mamelang. Shebang lipontšo tseo re phelang tlasa tsona ka mona. Joale, ha se nthoana ea... ’Na, ka bona, ke mpa ke le monna feela, ha ke le moreri, eo le ka buang ka eëna. Ha ke na thuto, seo lefatše le se bitsang, “moreri.” ’Me röna re bafutsana feela. Shebang moaho oo re kenang ho oona. Shebang likhathederale, hoseng hona. Empa le shebe moo Molimo a leng teng. Eo ke eona ntho.

<sup>95</sup> Le Moabe o kile a ema mono ka phatsimo ea hae le ka botle ba hae, empa Iseraile a ahile litenteng. Empa Molimo o no o le hokae? Tlase mono ho ne ho lutse sehlopha sa bathoana ba bahalaleli ba thetthehang, ba etsa tsohle tse phoso. Empa Baalame, bishopo oa bona—bona, ha a ka a bona Lefika le teiloeng, Noha ea Borase, Topallo eo ea Mollo. Mahlo a hae keha a foufetse. O sitiloe ho E bona. O itse, “Ba mpa ba hakanya Hoo feela.” Empa O ne a le teng mono.

<sup>96</sup> Ho bokoe Molimo, oh, O teng mona! Molimo o teng mona, ’me O etsa seo A se entseng. ’Me O tla tsoela pele. Re bapisa Lengolo ka Lengolo. Molimo ha o eso Itake e le nthohali e itseng,

holima lefatše, empa esale A ahile hara batho ba tlase le ba ikokobelitseng. 'Me Ke enoa mona hoseng hona, o sebetsa ka ho tšoana. Lengolo le a E netefatsa. Khamera e a E netefatsa. Joale, Hoo, lebaka leo ke supang setšoantšo seo, ha se kahobane ke le teng mono. Ke—ke moetsalibe feela, ea pholositsoeng ka mohau, joaleka lona. Empa seo ke lekang ho se bua, ke, hore Ke Boteng ba Hae bo nang le rōna. Ke eona ntho ea sehlooho. Be, haeba A mpeile e—e Elisha ea tlileng ka nama, hola u se na tumelo ho e lumela, e ne e sa tlo u thusa ka letho.

“O tlide ho ba Habo. Ba Habo ha ba ka ba Mo amohela.”

<sup>97</sup> Ke lona lebaka, motseng oona kajeno. Khele, mona nka qala tsoseletso, kahara moahohali o itseng kapa ho hong, le ke ke la fumana batho ba bangata ba lumelang. Ba mpa ba sa tl'o e etsa. Ba ke ke ba khona. Letsatsi le se le fetile.

<sup>98</sup> Eona thuto ena, ea hoseng hona, koana Afrika, e ka hlahisa likete tse leshome, bonnyane, ho ka isoa meeä e likete tse leshome ho Kreste; athe koano mohlomong ho lutse moetsalibe a le mong hoseng hona, kapa ntho e 'ngoe, mongala o itseng. Boholo ba bona bo phophothiloe ka bottlalo le ka bottlalo, hofihlela ho felile. Ke phetho.

<sup>99</sup> Empa re leka ho re, ke, hore Lengolo le bapa le Lengolo. Joale, ho sa tsotellehe boholo ba boiphihlelo, ha bo sa bape le Mangolo, bo phoso.

Urime Thammime, ho sa tsotelle ho loka ha moporofeta, ekare ha a buile 'me maseli ao a sa tšoelime holima Urime Thammime, phoso e ne e le teng. Ho sa tsotellehe botle ba toro, haeba e sa tšoelime holima Urime Thammime, e ne e le phoso.

Mohla boporista boo bo ne bo fela, Molimo o ile oa phahamisa Bibele ea Oona. Pauluse o boletse, “Ekare ha Lengeloi le tsoang Lehelimong le fihla,” Bagalata 1:8, “le bolela evangeli esele ho eo le seng le e boleletsoe, le rohakoe.”

<sup>100</sup> Lengeloi le tsoang Lehelimong le boleletse Johanne mosenoli, etsoe e ne e le Molimo ka Sebele, “Ke 'na Jesu ea rometseng lengeloi la Ka ho netefatsa, kapa ho bontša lintho tsena.” O itse, “Ekare ha e mong a eketsa lentsoe le le leng ho Eona, kapa a fokotsa Lentsoe le le leng ho Eona, le eèna o tla hlakoloa Bukeng ea Bophelo, sebakeng sa hae.” Ena ke Eona, Bibele.

<sup>101</sup> Ka baka leo, maiphihlelo ana le lintho tse re hlahelang mona, haeba e sa netefatsoa ke Lentsoe la Molimo, bo tla be bo fosahetse; ha ke tsotelle se tlang ho hlaho, bo tla be bo fosahetse. Ka baka leo ho latela Lengolo, ke 'Nete ea makoma. Oh, ke thabetse ho ba setho sa 'Mele o moholo oa Kreste.

<sup>102</sup> Joale, ha re khatheng tema joale, re theohela thutong. Joale, re qeteletse holimo mona moo ho itsoeng, “Haele moo re teetsoe hare...” Che... Ke masoabi. Hoo, ke qotsitse khaolo ea 12. Esale ke e bala, empa ha ke eso e batlisise. Ke...

<sup>103</sup> Moena Norman, ea lulang lapeng ha ka holimo mane, ebile o a tseba hobane ke fihlile maobane, le baena ba tseba, tlase mono, ke sa tsoa kena. Nako ea ho bala Lengolo feela, ke e fumane ke lutse hantle mona, metsotso e 'maloa e fetileng. Ke hantle. Ke sa Le hilahlobe, ke mpa ke emela Moea o Halalelang ho Le aba kamoo A e batlang. O tseba moo motho a leng teng—teng, ea tlamehang ho Le fumana. Ka baka leo haeba ke qetile le monahano oa ka mabapi le seo ke tlang ho se bua, ekaba ho phoso. Empa ha nka Mo lumella ho sebetsa, O tla Le romela moo Le tšoanetseng teng. Ua bona? “Le se ke la nahana seo le tlang ho se bua, hoba ha se lona Ba buang, Ke Ntata lona ea ahileng ka ho lona. Ke eèna Ea buang.”

<sup>104</sup> Joale, khaolo ea ho qetela, khaolo e sa tsoa feta, re utloile sena, ho re, “Ana re tla phonyoha joang, haeba re sa hlokomele poloko ena e kaalo; Ea boleletsoeng rōna pele ke Morena Jesu, le Eo ka ba Mo utloileng?” Lintho tseo Jesu a li entseng, ho li bontša, ke tsona lintho tse etsahalang mona: lona Lengeloi la Molimo, eona mesebetsi, kholiso eona eo, ntho eohle ka ho tšoana, ntho eohle ho tla joalo, eona Evangelie eo, e bapang le Lentsoe. “Efèla haeba e rutiloe ke Morena, ea ntano tiisoa ke barutuoa ba Hae bao re ba utloileng,” Pauluse o ne a itšoanelo, “ana re tla phonyoha joang, ha re sa hlokomele poloko e kholo hakaalo?”

<sup>105</sup> Joale, sena Pauluse o ne a se bolella mokhupi oa hae oa Baheberu. Joale, ba ne ba sena mabantaa a hatisang, kajeno, a kang a rōna mona. Empa ba ena le bangoli ba lutseng mono, ba E ngola nakong eo Pauluse a ntseng a E rera.

‘Me ke seo E leng sona hantle mona. Re ntse re E hatisa ka mabantaa, ‘me mabantaa ana a ea lefatše ka bophara, ua bona, ho supa hore Ke ’Nete. Borapeli ba rōna ha se ba lefeela, Ke Jesu Kreste ea tsohileng kannete, ke ntho e tšoanang. Joale ha rea tšoanelo ho E hlokonomoloha.

<sup>106</sup> Joale, kajeno, u se ke ua tloha kerekeng, ua re, “Be, ke batla ke thabela ho theohela mono. Ke rata ‘mino, ‘me batho bao ba kerekana eo ea khale ba mosa.” U se ke ua etsa joalo.

<sup>107</sup> Moena, e re pelō ea hao e tuke, ho re, “Mona, ke tlameha ho etsa ho hong ka ntho eona. Ke tlameha ho tsoa ho bona haeba nke ke ka pholosa motho.”

<sup>108</sup> ‘Me u se ke ua tsoa, u ntse u re, “Ho bokoe Molimo, ha u sa bake, u tla timela.” Che.

E atamele ka bonolo. “Le be masene a linoha, le hloke sekoli sa maebakhorona.” Ua bona, e atameloa joalo. Atameloa motho, haeba a hoeba ka likhoho, bua ka likhoho, le eèna, nakoana. Ua bona? ‘Me hape, ntho ea pele, u tla be u bua ka Morena. Haeba e le mopolasi, qoqa le eèna ka polasi ea hae.

<sup>109</sup> Haeba a rekisa makoloi, qoqa ka makoloi a hae, nakoana, “Makoloi a hao a matle hakakang,” le joalo. Ua bona?

<sup>110</sup> Ho fihlela u kena Moeeng, ha Ntate a re, “Joale ke nako ea ho mo atamela ka moea oa hae.”

<sup>111</sup> U ka e sotha, ua bona, “Ke koloi e ntle eo. Ua tseba ho thota liphahlo, kajeno, ke ntho ea tonana. Oh, lichaba li se li bile li atamelane; le metse ea lichaba tsa rōna, e atamelane. Metsoalle le bommè ba ka etelana. U a tseba, ho hotle ho fumana makoloi a kang ao u a rekisang.”

<sup>112</sup> “E, monghali. Ehlide bo. Uh-huh.” U a tseba, nakong eo a ntseng a hopa sigara sa hae, kapa e ka bang eng. “Yaa, ano, ke makoloi a matle.”

<sup>113</sup> “Na u kile ua nahana seo baholo ba neng ba ka se nahana ho bona ntho e kang eo?” Tsoelapele joalo, u a tseba.

Ka mora nakoana, e re, “Ehu, yaa, ehlide bo.”

<sup>114</sup> “Ua tseba, ntho e ’ngoe, lia re thusa, joaloka litsoseletsong tsa rōna. Batho ba ka parola naха, ka potlako, ho etela tsoseletso.” Ua bona, u ntse u bula tsela, ka linako tsohle, u a tseba.

<sup>115</sup> Ha u utloa ho hlahha Ntho e katang tsela, emisa hona mono, u suthele ka *mona*. Mokana ngaka e kile ea bua, koana Phoenix, ho re, “Morena, tlatsa molomo oa ka mantsoe a molemo, u ntano nqhoaea ha ke buile ho lekana.” U a bona? Yaa. “Nqhoae ha ke buile ho lekana.”

<sup>116</sup> Joale, le elelloe joale, re tla qala khaolong ea 15, kapa temaneng ea 15 ea khaolo ea 3, ka kelohloko joale.

*Ha ho ntse ho thoe, Kajeno ha u...utloa lentsoe la oona, le se ke la thatafatsa lipelō tsa lona, jolaoka mohla phephetso.*

<sup>117</sup> Joale shebang Pauluse ea buang mona. Joaleka ho thoe, “Kajeno, ka mora litšui tse ngata hakana.” Re tla kena ho eona ka mora nakoana, ho thoe, “Kajeno, ka mora litšiu tse ngata.” Re kena khaolong e latelang, “Ka mora litsu tse ngata hakana.”

*...ho ntse ho thoe, Kajeno ha u...utloa lentsoe la oona, le se ke la thatafatsa lipelō tsa lona, joaloka mohla letsatsi la phephetso, mohla ba ne ba phephetsa Molimo.*

<sup>118</sup> Joale ha re baleng temana e latelang.

*Na ba le utloileng, ba ba ba phephetsa, ke bafe:...*

Joale ebe o bua kang? Evangel.

*...na hase bohole ba tlohileng Egepeta ka Moshe.*

*Ana ba o halefisitseng ka lilemo tseo tse mashome a mane ke bafe? Ana hase bohole ba sitiloeng, bao litopo tsa bona li oetseng feelleng?*

<sup>119</sup> Ha re emiseng motsotso mona. *Phephetso*, “mohla ba ne ba halefisa.” Joale eaba Molimo o etsang? Joale Pauluse o ntse a leka ho bua. Ba ntšitsoe ke Eng Egepeta? Ana e ne e le Moshe? Che. Moshe e ne e le sesebelisoa sa nama.

<sup>120</sup> Joale mona re hahile motheo. Joale re batla ho e otlolla. Etlare ha re fihla lethebeng lena tlase mona, metsotsong e 'maloa, le tla—le tla e bona.

<sup>121</sup> Joale, Molimo batho ba Oona ba ne ba sa phomola. Ba le tlase Egepeta. Ba tsoile malulong a bona a nèpahetseng. Ba tsoile lehaeng la bona. E ne e le baeti le bafeti, 'me Molimo o no o tla ba ntša tulong eo e koaletsoeng, ka hara—hara Egepeta, ho ba nyollela lehaeng.

<sup>122</sup> Papiso ea kajeno; ha rea tsitsa. Mona ho se ho se hokae. Bashanyana ba matsoho a borelei ba bapalang limabole, bananyana ba tsoeng lipopi, ba bapala; ntho ea pele u a tseba, u hlaha moriri o mopotsoa, 'me u a sosobana. Phoso e teng mona. Lena hase lehae. Re sebakeng se phoso. Ke ka baka leo re reng re baeti le bafeti. Ntho e 'ngoe e hlahile.

<sup>123</sup> Mofumahatsana o buile, hoseng hona ka phaposing, ka litševo tseo batho ba mo jang tsona, ka linako tse ling. Ka re, "Empa, khaitseli, moratuo, ha u oa habo batho bao." Rōna re batho ba fapaneng.

<sup>124</sup> Ngananyana oa ka o itse, "Ntate, banana ba *itseng-ba itseng* ba entse hore *ho itseng-ho itseng* le lintho tseo ba li entseng."

<sup>125</sup> Ka re, "Empa, sheba, ratu." E le ha ba tsoere lirekoto tsena tsa Elvis Presley. Ka re, "Ha ke li batle ka tlung ea ka."

<sup>126</sup> A re, "Empa, ntate, ke banana ba lokileng ba banyenyane."

<sup>127</sup> Ka re, "Mohlomong ba joalo. Ha ke na letho khahlano le hoo. Empa ntho e le 'ngoe e teng, re fapan. Re fapan. E seng kahobane re batla ho fapan, empa Moea o leng ka ho rōna o tsoile nthong eo. Le se le ba lefatše le leng."

<sup>128</sup> Ha ke fihla Afrika, ha ke khone ho itökötèla mokhoeng oa bona—bona—bona oa bophelo. Ha ba apare liaparo. Ba tsotse. 'Me ba thonaka eng le eng e bolileng, e nyeunyang libokoanantsi, ba e ja, leha ho le joalo; ha ho phapang ea letho. Ua bona?

<sup>129</sup> 'Me Sena se fapan. U a tseba, ka mohla o mong, bohle re ne re le joalo, empa tsoelopele e re fihlisitse ea re fetola ra fapan.

'Me tšokolocho e menahantse hoo makhetlo a milione. Ha re sa batla lintho tse bolileng tsa lefatše. Kreste o re fetotse Bakreste; joaloka ha tsoelopele e re hloekisitse. 'Me le lemohe, hase ho fela, empa re ipolela re le baeti le bafeti. Ha re ba lefatše. Ebile, ha u batle letho la lefatše. 'Me lintho tseo li fetile.

<sup>130</sup> Joale, Iseraele o ne a le tlase Egepeta. E ne e se Baegepeta. Baegepeta, e ne e le sekhobo ho Moegepeta ho tšoara nku. 'Me Israele e ne e le baalosi ba linku. Le kamoo taba eo ebileng ea fihlela Moshe, hoba a ikatele ka seriti sohle sa Moegepeta, baalosi ba makhom.

Ana le lemohile seo Faro a se boleletseng Josefah, le lintho tse joalo? "Ke manyala." Ha thoe, "Lona batho ting le balisa ba manku." 'Me le Moegepeta a sa lokela thetsa molisana oa manku ka letsoho. E ne e le batho ba fapaneng.

<sup>131</sup> 'Me le Mokreste o joalo, kajeno, ha a tsoetsoe labobeli. Ha se... Ke litšila ho eèna ho khema le batho ba noang ba etsa mesoaso e khopo, le basali ba tsotseng. 'Me ntho efe... Eona, ke—ke litšila. Oh, ho bokoe Morena! Mona re baeti. Mona re bafeti. Moea o sokolotsoe, 'me re batla Motse oo basali ba sa apareng lishoto. Re batla Motse oo ba se nang litamene tsa joala. Re batla Motse moo ho ahileng ho loka. Ka baka leo, re baeti.

<sup>132</sup> Ka baka leo, Molimo oa theoha ka khanare ea Mollo, e le Selikalikoe, oa haola oa itšohlometsa sehlahleng 'me oa qala oa Itšenolela Moshe, pele. Moshe a re...

Le tseba thuto ea rōna ea bosiu bo bong, kamoo mehleng ea Jesu lefatšeng mona, A itseng, "Be, pele ho Moshe, KE TENG." E ne e le Jesu sehlahleng se tukang, ka Topallo ea Mollo. Ke Jesu, kajeno, ka ho tšoana.

'Me O Itšenotse ka Topallo ea Mollo, 'me Moshe a fumana boiphihlelo. O theohela Egepeta. O rera Evangelii, litaba tse molemo, mehlolo le meeka ea mo sala morao. Le a e tšoara? Ho a tšoana kajeno.

<sup>133</sup> Hase hoo feela, empa mohla Baheberu ba tsoang, ba tsamaea Leseling, keha ba eteletsoe pele ke eona Topallo eo ea Mollo. 'Me Bibele e itse, "U se ke ua leka Molimo."

<sup>134</sup> Shebang sena. E reng ke Le bale.

*Ha ho sa ntse ho thoe, Kajeno ha u...utloa lentsoe la oona, le se ke la thatafatsa pelō tsa lona, lentsoe la hae le bua le pelō ea hao, joaloka mohla phephetso, mohla ba Mo halefisang.*

Mamelang.

*Na ba le utloileng, ba ba ba o phephetso, ke bafe:...*

<sup>135</sup> Ba tsebang hore Baiseraele ba halefisitse Molimo ka ho se lumele ha bona ba bakae? [Phutheho e re, "Amen."—Mong.] Ba ile ba lumaluma, bona, ka bottlalo. Molimo o ile oa theohela mono o tsamaea. 'Me eareha bohole ba fihla... Ntho ea pele, ba kena khathatsong.

Topallo ea Mollo ke e ne e leketlile holima bona. Ha ke tsebe haeba ba E bone bohole, kapa che. Bonnyane, Moshe o E bone. 'Me E ne e leketlile holima bona, 'me ba E shebeletse. 'Me eitsha ba theoha... Ho ka thoeng ha ba sa E bona, ha ke tsebe haeba ba khonne kapa che. E ne e ba eteletse pele. Bibele e itse E ne e le teng mono.

<sup>136</sup> E itse, "Naleli e ile ea tsamaisa banna ba bohlale." Ha ho mang ea E boneng haese banna ba bohlale. E fetile holima

bolepi bohole. Ba ne ba boloka nako ka linaleli. Ha ho mang ea E boneng haese banna ba bohlale. E ne e etselitsoe bona ho E bona, 'me Naleli e ne e romeletsoe banna ba bohlale.

<sup>137</sup> 'Me Topallo ea Mollo e ne e romeletsoe Moshe, le Moshe a rometsoe ho bana ba Iseraele. 'Me keha ba tlamehile ho sala Moshe morao. Ba bone Moshe, 'me Moshe o bone Leseli.

Ke bao ba tsamaea!...?... 'Me ba tsoile, ba fihla Leoatleng le Lefubelu. 'Me, oh, ba—ba eso bone lipontšo tseo tsa mehlolo le lintho tse hlahileng mehleng ea bona tlase ka hara—ka hara naha ea khale ea Egepeta, empa eareha ba tsoa ba kena leetong la bona, ba sa tsoa sokoloha 'me ba 'ntšoa. Eaba, ntho ea pele u a tseba, ba kena khathatsong.

<sup>138</sup> Molimo o rata ho u kenya khathatsong. O rata ho hlahisa bothata ho bona seo u tlang ho se etsa ka bona. Eaba O emisa Leoatle le Lefubelu feela, 'me ntho ea pele u a tseba, a ba kenya hantle tulong ena, a ntano ba sasaletska ka Faro. Le bona kamoo Molimo a ratang ho e sebetsa? O rata ho pepesa matla a Hae le lerato. Ke Molimo, 'me O rata feela ho u bontša hore Ke Mang. Amen.

'Me bothata ba eona, kajeno, batho ba re, "Oh, matsatsi ao a fetile." Che. Ebe Molimo o ka Itšenola joang, haeba le rutoa lintho tse joalo? Empa Molimo o rata ho Iponahatsa.

<sup>139</sup> Bana ba Iseraele ke bana ba e tla, ba tsamaea Leseling. Moshe, a ba eteletse pele. Keha e le bao. "Tloong. Tsela ke *ena*. Molimo o a bitsa. Rea tsoa. Re ea lefatšeng la pallo."

"Oh, alleluia!" E ne e le bana bohole, ba hooeletsa, 'me ba tlolaka, 'me ba inyakaletse, u a tseba. 'Me ntho ea pele u a tseba, ba hetla morao 'me ba re, "Oh, lerole leo ke la'ng?"

<sup>140</sup> E mong oa bona a hloa leralla, ha thoe, "Oh, oh! Jo 'na, jo 'na! Ke lebotho la Faro."

<sup>141</sup> Molimo oa re, "Le tšohile keng? Ana ha le a ka la lumela seo Ke se entseng tlase mono? Le belaetse keng? Le Nkhalefisa keng?"

<sup>142</sup> Eitseha ba fihla tlase mono, Moshe a tsoa a ba rapelisa ho Molimo. Molimo oa ba oa phetla Leoatle le Lefubelu ba ba ba tšela; sera sa pupetsoa. Molimo o sebetsa joalo. U se ke ua tšaba. U se ke ua sisimoha. U se ke ua ferekana. U halefisa Molimo.

<sup>143</sup> Eaba O etsang? Ea ka re, "Be, ra hla ra kena bothateng; ho bokoe Molimo, re bo hlotse. Ha re sa tla fumana bo bong. Re leetong la rōna le eang lefatšeng la pallo." A ntano ba tataisetka lehoatateng, moo metsi a leng sieo. Na le ka e nahana? Molimo, ka bahalaletsoa ba Hae—ba Hae, batho ba mokhetho, a ba isa hantle lerabeng *lena*; a ntano ba tšoasolla lerabeng leo, a ntano ba isa hantle moo metsi a leng sieo. Atha A ka be a ba isitse moo metsi a leng teng. Hobaneng, A ka

be a khonne ho hlahisa noka, ka linako tsohle, holane A ne a batlile. O be a ka phetla thaba e 'ngoe le e 'ngoe ka thabo, ea ba ea tsaleratsa metsi bophahamo ba maoto a mashome a mahlano sebakeng, haeba A ne a batlile. Ehlile, O ne a ka khona. Empa holane A etsa hoo, ho ka be ho bile bonolo haholo. Oh, khili! Ho bokoe Lebitso la Morena.

<sup>144</sup> "Hobaneng Molimo o lumeletse *sena* ho hlaha, Moena Branham? Hobaneng Molimo?"

Ke Molimo o etsang hoo. Mo tloheleng. 'No tsamaee feela. Ke mosebetsi oa Molimo oo. "Mehlala ea ba lokileng e laoloa ke Morena." E, monghali. Ho etsa phapang efe?

<sup>145</sup> "Ke lahlehetsoe ke chelete eohle, Moena Branham." Be, ho bokoe Molimo, leha ho le joalo.

<sup>146</sup> "Oh, ke entse *sena*, 'me ho hlahile *sena*, sefefo se pheutse ntlo ea ka."

<sup>147</sup> Ho bokoe Molimo, leha ho le joalo. "Morena o neile, Morena o boetse o nkile, ho bokoe Lebitso la Morena." 'No tsamaee. Ntho eohle ke khanya ea Molimo. Molimo o tseba seo O se etsang.

Ba feta metsing, ba feta meroallong,  
Ba feta litekong tse tebileng, empa bohle ka  
Mali.

<sup>148</sup> Ke mokhoa oa Hae ho re tataisa. Ke hantle. Oh, khili! Ke ikutloa ho emisa ke hooeletse. Ke mokhoa oa Hae oa ho tataisa bana ba Hae ba ratehang. Oh, na le khona ho utloa... Joale, ha ke mosaekholoji, empa na le ka utloa Moea o ratehang oo o khurumelitseng moaho joale? [Phutheho e re, "Amen."—Mong.] Ho ka thoeng holane mahlo a rōna a ka tutubolloa hona joale feela, ra bona ho emeng pel'a mabota ana, holimo-le-tlase lipakeng tsa litulo?

<sup>149</sup> Oho Elisha! Hoseng ho hong, mohla moshanyana eo a foufetseng phoufalo, o itse, "Sheba Basiria tlase mono."

Ha thoe, "Empa ba ho rōna ba fetisa ka bongata."

Ha thoe, "Ha ke bone motho."

Ha thoe, "Morena, tutubolla mahlo a moshanyana eo."

<sup>150</sup> A qamaka a bona moporofeta eo oa khale, hohle ka mathoko ho moo, keha lithaba li tuka Mollo, le lipere tsa Mollo, le makoloi a Mollo. Eaba o kholiseha hona moo.

<sup>151</sup> A re, "Re tla tloha feela re ba otle ka bofofu." Keha ba bona ka phethahalo e khonehang, empa keha ba foufetse ho èena. Ha thoe, "Ana le batlana le Elia?"

Ha thoe, "E, monghali."

<sup>152</sup> "Tloong, ke tla le bontša moo a leng teng." Athe e ne e le èena, ea ba tataisang. Keha ba sa tsebe.

<sup>153</sup> Le kajeno ho joalo. Kreste o teng mona. Moea o Halalelang o teng mona, o etsa tseo esaleng A li etsa, 'me lefatše le E foufaletse. Ha ba E tsebe. "Oh, ha ke—ke tsebe letho ka taba Eo. Molisa oa ka . . ." Oh, batho ba batho ba tšeremang! Le bona seo ke se bolelang? Ba E foufaletse. Ha ba E tsebe. Molimo o ntse a tataisa.

<sup>154</sup> Joale, ba ile ba nyoloha, ba parola Lefeella la Sebe, metsi a le sieo mono. Molimo keha a e hlahisitse eohle. Oh, eaba ba fumana qanthane ea metsi, ba re, "Ke eona." 'Me keha ba sa khone le a latsoa. Oh, ho ne ho tšabeha. Khele, a—a feta le sebabole sa lipheserente tse lekholo. Ua bona, ekare mahe a bolileng, u a tseba. "Oh, khili! Ho a tšabeha." E ne e le chefo. Joale, hoo ho bitsoa Lefeella la Sebe. Mono keha ho metse lifate tse 'maloa tsa palema, le seliba seo lipalema tseo li hlahisitsoeng ke sona. Eaba Moshe o re, "Le se ke . . ."

<sup>155</sup> Molimo oa re, "Hobaneng ba etsa hoo? Hobaneng ba etsa hoo? Hobaneng ba Nkhalefisa? Be, efela haeba Ke entse *hoo* morao mono, na Nka sitoa ho etsa letho ka maemo ana?"

<sup>156</sup> Haeba A kile a folisa hang, na A ke ke a u loela teng hape? [Phutheho e re, "Amen."—Mong.] Haeba A u ntšitse bothateng, na A ke ke a u ntša ho bo bong? ["Amen."] Ho bokoe Molimo! Haeba A nkholutse sebeng, A ka 'ntša lebitleng. Ke Molimo. E etsa phapang ea eng? Tsoelapele feela, tsepamisa mahlo a hao ho Eēna.

<sup>157</sup> Ha thoe, "Haeba Ke boetse ke khutlisitse Leoatle le Lefubelu, ho quelisa Baegepeta bao, na ebe metsi ana a ka Ntšita? Ebe le Nkhalefisa ka life? Oh, ho se lumele ha lona! Lea Mphephetsa le nkhalefisa, ka ho se lumele ha lona."

<sup>158</sup> Joale mona ho sebelitsoe lentsoe, "Sebe," ho phephetsa. Ho etsa . . . Lebaka leo ba entseng hoo, ba hlokile ho lumela. Ha ba ka ba tloha ba bapala mataese, joale, le lintho tse kang tseo. Ba sa ka ba hloaela le mosali oa motho e mong, le ho tsoa ba bolela mashano. Ba ne ba sa etse hoo. Empa, hase sebe, le ho qaleng.

<sup>159</sup> Ho phela ka bofebe ha se sebe. Ho tsuba, ho poroma, ho noa, ho mokola, ho rohakana, ho tlaela, le tse joalo, ha se sebe. Ke litholoana tsa ho se lumele. U e etsa kahobane u le mosalumele. Ha u le molumeli, ha u etse hoo. Ke ka baka leo Jesu a itseng, "Ea utloang Mantsoe a Ka 'me a *lumela* ho Ea Nthomileng, o na le Bophelo bosafeleng." E seng ea *reng* o a lumela, empa a hlile a lumela! Ke eona. Hoo ho tlosa bopaki bohle ba lona ba mantlha. Ua bona? Joale, ke lona bao.

Ha se, "Ea utloang Mantsoe a Ka 'me a hooeletsa." Ha se, "Ea utloang Mantsoe a Ka 'me a bua ka lipuo." Ha se, "Ea utloang Mantsoe a Ka 'me a lutla mali letsohong la hae kapa sefahlehong sa hae," kapa e ka bang eng. Ha se Eona.

"Ea utloang Mantsoe a Ka 'me a lumela ho Ea Nthomileng, o na le Bophelo Bosafeleng, a ke ke a tla Kahlolong, empa o tlohile lefung ho kena Bophelong."

<sup>160</sup> Sebe keng? Ho se lumele. Ho ka tsoha nthoana, sebakeng sa ho e hlahloba ka Lengolo ho fumana haeba E lokile kapa che, “Oh,” u re, “Kea . . . Lekhale! Ua bona, mono, u tsoelapele. Ke tla itulela ke le Presbyterian, ua bona.” Tsoelapele, sefov, ’me u phephetsa Molimo.

<sup>161</sup> Molimo ha u etsa taba, O lebeletse sechaba ho E phamola. Empa, sebakeng sa hoo, “U a tseba, be, ha ke tsebe letho ka taba Eo.” Ua bona? O lebeletse batho ho E tšoara. Ha u khollisehile ka ho lekana, ho lula fatše ka Lengolo. Ho E hlahloba le ho E batlisisa ka botlalo, ho ea morao le pele, le ho bona haeba E hlahile, haeba E boletsoe pele ho hlaha, le joalo. Ke hona mohla u tlang ho E tšoara. Amen.

<sup>162</sup> Joale u lemohe.

*Ha ho sa ntse . . . Kajeno ha u . . . ha le utloa lentsoe la oona, le se ke la thatafatsa pelō tsa lona, joaloka mohla phephetso, mohla Molimo o no o halefisoa ke bona, u a bona.*

*Na ba le utloileng, ba utloileng evangeli e boletsoeng ke Moshe, ba ba ba o phephetsa, ke bafe: Na hase bohle ba tlohileng Egepeta ka Moshe.*

<sup>163</sup> Ba tsebang palo e bolokehileng hara sehlopha sa mantlha ba bakae? Ba bakae? [Motho o re, “Ba babeli.”—Mong.] Ba babeli, e nèpahetse. Ba bakae ba tsebang mabitso a bona? [“Kalebe le Joshua.”] Ke hantle. Kalebe le Joshua, bona feela ba babeli, ho tsoa limilioneng tse peli le ho hong.

<sup>164</sup> Mamelang sena. “Empa ea . . .” Temana ea 17 joale.

*Ana ba o halefisitseng ka lilemo tse mashome a mane ke bafe, ka ho se lumele. Na hase bona ba sitiloeng, ba sa kang ba lumela . . . ?*

<sup>165</sup> Nkang bukantsoe le fumane seo *sebe* se se bolelang. Nkang bukantsoe ea Bibe. Ke ho se lumele. *Ho se lumele* ke “*sebe*.” “Ea sa lumeleng o se a ahlotsoe,” Mohalaleli Johanne 4, ua bona, “o se a ahlotsoe.”

*. . . bao litopo tsa bona li oeleng felleng?*

*’Me ke bomang o kileng oa hlapanya hore ba ke ke ba kena phomolong ea oona, . . .*

<sup>166</sup> Ho se lumele ha lona! Oh, kamoo ke sa tlo fihla sehloohong sa ka. Empa, shebang, ke bona bothata ba sechaba, kajeno. Lipontšo le meeka li haotse le sechaba sena. Ebe ba etsang? Ba E nehile sekotlo ba sa phetse. ‘Me O itse, “Ke anne Ka re ha ke sa tla ba kenya Lefatšeng leo ba kileng ba le toba.”

<sup>167</sup> Molato oa likerekehali tsena ke ofe kajeno? Ho se lumele ha tsona ho phephelitse Molimo. Alleluia! A ka tsosetsa Abrahama bana le ka majoe ana. O lekie ho ba neha Evangel, ’me ba thatafalitse lipelō tsa bona. Ba ipopa mokha, ’me ba bope

malumeli a manyenyane, “”Me rōna re lumela *sena* le letho lesele,” ’me Molimo o sitiloe ho kena kahare. Ba hokae kajeno? Ba lutse moeling.

<sup>168</sup> Sehlotsoana sa Molimo, se tšepehang se ntse se tsamaea, ka lipontšo le mee ka. O ntse a ba fetisa tekong. “Mora e mong le e mong ea tlang ho Molimo eka khona a lekoe a lauoe pele,” koetliso ea ngoana.

<sup>169</sup> Nthoana ea pele e hlahileng, “Oh, be, mohlomong ha ho letho ho Eona, le hona.” U ngoana oa boyatsi, ’me ha u ngoana oa Molimo.

<sup>170</sup> Hoba ngoana oa Molimo ke Peō ea Abrahama, ea bitsang tse neng li le sieo, eka hoja li ne li le teng, “Molimo o itsalo,” a ’ne a tsoelepele. Amen. Ho sa tsotellehe se buang, kapa ntho efe e fapaneng, ha ba khaotse ho tsamaea, le hona. “Molimo o itsalo.”

<sup>171</sup> O kile a emela lesea lilemo tse mashome a mabeli a metso e mehlano, ho sa tsotellehe kemokhahlano ea eona. ’Me o ile a ikarola ho bomosalumele bao, amen, a tle a khone ho lumela. Oh, khili! Ke ikutloa ke halalela.

E nahanneng. U tlameha ho ikhetha tšomong eo ea lefatše, “Ah, matsatsi ao a mehlolo a fetile. Ntho e kang Eo ha e eo. Ke bohlanya.” Ikhethethe.

<sup>172</sup> Bibele e boletse, “Tsoang ho bona, le ikhethethe, ho bolela Morena, ’me Ke tla le amohela.” Ho babatseha hakakang! “Ke tla le amohela, hoba le ikhethethe. Le tla ba bana ba Ka. Ke be Molimo oa lona. Ikhetheng. Le se sikare joko e le ’ngoe le baetsalibe.” Ke hantle.

<sup>173</sup> Mohlankana ea nyalang, o nyetse ngoana ea sa lumeleng; kapa mosetsana ea nyaloang ke moshanyana ea sa lumeleng. U se ke ua etsa joalo. Ha ke tsotelle khahleho ea moshanyana, le—le, kapa khahleho ea ngoanana, le mahlo a makakang a maholo ao a hae; a tla rothofala le leng la matsatsi ana. Empa, moena, moea oa hao o tla phela kamehla. Hlokombela seo u se etsang. Ha ngoanana e se molumeli oa sebele, kapa moshanyana e se molumeli oa sebele, se sikare joko e le ’ngoe ka mokhoa oo. Tsamaela hole le lintho tse joalo. E tla hlahisa mathata tlase tseleng.

<sup>174</sup> Joale mamelang, temana ea 17.

*Ana...ba mo...ba o halefisitseng ka lilemo tse mashome a mane ke bafe? Na hase ba sitiloeng, bao litopo tsa bona li oeleng feelleng?*

*...ke ho bomang kileng oa hlapanya hore ba ke ke ba kena phomolong eo,...*

<sup>175</sup> Ba ile ba qala, empa, ba bone mehlolo, empa ha ba fihla lefatšeng la pallo. Haese palo e khethiloeng, ea babeli, ba kenang lefatšeng la pallo.

<sup>176</sup> Joale Pauluse o etsang? Joale o ntse a buisana le Bakreste, “Le se le la lumella Evangeli ena, e kileng ea boleloa motšeо koana, ka lipontšo le ka meeka, athe ba kile ba etelloa pele ke Topallo ea Mollo; mohla tsena li boelang li hlaha, le se ke la oela kathoko ho tsela, ka ho se lumele, la tloha le belaela, hobane litopo tsa bona li kile tsa oela feelleng.”

<sup>177</sup> Joale rea kena, ka potlako joale. Le ele hloko.

... *haese ho ba sa kang ba phela?*

*Ke moo re bonang hore ba ne ba sitoa ho kena ke ho se lumele.*

O e bitsa *sebe* hang, khetlo le latelang o e bitsa *ho se lumele*. *Ho se lumele* ke “*sebe*.” “Ba sitiloe ho kena, ke ho se lumele ha bona.”

<sup>178</sup> Ba bone moporofeta eo, Moshe. Ba bone ketso ea hae, ho bona seo a se buileng. E ne e le ’nete, nako le nako, ho tsoelapele e ’Nete hantle. Topallo ena ea Mollo e ne e ba hlahela. Ba kile ba E shebela. Ba E bone.

<sup>179</sup> Pauluse, hamorao, o a leka, ho theohela tlase mona, boiphihlelo boo a kileng a bo fumana. Ua bona? O leka ho phetha tsa boiphihlelo, o kile a bo bapisa le Testamente ea Khale. O itse, “Joale re kene nthong e ncha, lekhatheng le lecha lena, ka Jesu Kreste. Mehleng ea khale, Morena o ipontšitse bona ka baporofeta, empa Eèna joale ka Mora oa Hae, Jesu.” Ua bona? ’Me o qala a bapisa maiphihlelo ao ’me a ba bontša se neng se etsahala, kamoo mehlolo le meeka, le ntho eohle, le taba e neng e ngotsoe.

<sup>180</sup> Joale o itse, “Ba sitiloe ho kena, ke ho se lumele ha bona.” Ha ba ka ba lumela.

<sup>181</sup> “Empa joale, rōna, re kenela lekhathe le leng, ’me le se ke la thatafatsa pelō ea lona. Le se etsise bao, ba mehla ea phephetso, mohla ba ne ba phephetsa Molimo.” Ba sebelitse joang? Ha ba phela bophelo bo sa hloekang. Ntumelleng ho e khokhothela ka ho lona.

<sup>182</sup> U re, “Moena Branham, ke tsamaea kereke.” Hoo ho lokile. “Ha ke eso bua leshano bophelong ba ka.” Ke botle. “Ha ke eso utsoe. Ha ke eso etse *sena, sane*, kapa se *seng*.” Ke botle haholo. Hoo ho itoketse. Empa, e sa ntse e se sebe.

<sup>183</sup> Sebe ke mohla Molimo a Ipontšang ebe moo u sitoang ho E lumela, ha u batle ho E mamela.

<sup>184</sup> “Oh,” u re, “kereke ea ka ha e rute ntho Eo.” Ha Bibele e fèla e E ruta, le Molimo a fèla a E pakela, ke eona taba.

Joale shebang nakoana. Joale re tlil’o qala ka ntho e tebileng, e tebileng haholo. Joale, kenya letsoalo la hao mokotleng oa veste ea hao hofihlela u tsoela kantle.

<sup>185</sup> Joale hlokomela ka hloko.

*A re tšabeng ke hona, haele moo, pallo ea ho kena ha rōna phomolong ea oona e sa le teng . . .*

*E motona, e motšeħali, ke maemeli a motho joale. Eng?*

*. . . esebe e mong oa rōna a ka bonahala hoba eka o haeletsoe ke eona.*

<sup>186</sup> Joale, Pauluse o ntse a leka ho ba bolella, khaolong e sa tsoa feta, ka lintho tsena. Empa joale o leka ho ba bolella seo E leng sona.

Oh, ana re na le nako? Ke . . . Mohlomong re ka emela bosiu bona. Nako e tsamaile, ebile re tlil'o tšoara tšebeletso ea thapelo. Mohlomong ho ka ba molemo ho e tšoara bosiung bona, hoba ehlide e tletse livithamini, livithamini tsa moea. Ke tlameha ho etsa tse ngata, ke maphathe thapama ena. “A re . . .”

*A re tšabeng ke hona, haele moo, pallo . . .*

<sup>187</sup> Joale, ana ba ba ne ba fuoe pallo ea lefatše la pallo, tlase Egepeta? ’Me, enere, ha Molimo o theoha, ho ho nèpahatsa pallo ena. Khele, Molimo o no o boleletse Abrahama, lilemo tse makholo le tse makholo pele, O ipoletse a tla e phethisa. E ne e khema le Mangolo.

<sup>188</sup> Josefa o itse, “Le se tlose masapo a ka mona pele le fallela lefatšeng la pallo ’me le mpate teng le bontate.” Ka hobane, a tsebile tsoho e tlang ho hlaha, mohila Jesu a tla tsaha bafung, kaha a tsebile se boletsoeng ke Jobo. Ua bona?

<sup>189</sup> Mang le mang oa baporofeta bao o tsebile seo moporofeta e mong a neng a se lekanya, ’me ba tsebile Moea oa bona o no o le mong. ’Me ba ne ba lebeletse. Oh, moena! Oh, hoo ho tlameha ho re tsukutla re tsoa maemong a lefatše. Mahlo a bona, keha ba sa a tsepamisa ho se buuoang ke batho, empa holima seo baporofeta ba se boletseng. E mong le e mong oa bona o ne a lebeletse.

<sup>190</sup> Abrahama o boletse, “Le mpate le Jobo moo a patiloeng teng.” Ha thoe, “Sara, ke tla reka setša sa mobu. Re tla patoa hona mona hantle.”

<sup>191</sup> Isaaka e ne e le moporofeta, a hlahlama ntatae. Ha thoe, “Mamelang. Le se le mpata kae le kae, le haele tlase mona Egepeta, le mpe le nkuke le nkhatlisetse lefatšeng la pallo. Le mpate hantle mona.”

<sup>192</sup> Jakobo o shoetse tlase lefatšeng la pallo, empa o boleletse mora oa hae, eèna e beng e le moporofeta, o itse, “U a tseba, Lengeloi le ne le ame lehlakore la ka bosiu bo bong. Ke qhilelitse esale le mohlang oo. Tloo, bea letsoho la hao . . .” Oh, mohau! “Mora oa ka oa moporofeta, ke tsofetse ’me ke foufetse. Empa bea letsoho la hao le halalelang, kaha le uena u le moporofeta, u le bee moo Lengeloi le kileng la bea letsoho la Lona, ’me u ane ho Molimo oa Lehholimo hore u ke ke ua mpata tlase mona.”

<sup>193</sup> Le bokoe! Mono! Na le bona tšenolo ea moea ea Lentsoe? Khele, halofo ea bona, nkare lipheresente tse mashome a robong, ha ba tseba seo a neng a se bolela. Empa o tsebile seo a neng a se bolela. “Bea matsoho a hao a moporofeta mona moo Lengeloi le kileng la bea letsoho la Lona. Nkile ka ba moholo, ke le monna ea koenneng, lekoala le khohlahetseng. Empa, O kile a nkama, ho tloha mohlang ke monna ea qhiletsang. Empa esale ke qhiletsa ke fetohile khosana. Esale le mohla ke fetolang mokhoa oa motsamao oa ka, ke beiloe khosana.” E. “Bea letsoho la hao mona. U hlapanye ka Molimo oa Leholimo, u ke ke ua mpata mona.” Hobaneng? Ha ho mang ea tsebileng seo a neng a se lekanya. Josefa o khonne. O itse, “Le nkuke le mpate lefatšeng leo la pallo.” Ke hona moo e neng e le teng. Ruri.

<sup>194</sup> Josefa mohla a ne a eshoa, lilemo hamorao, o itse, “Le se ke la mpata tlase mona. Le mpe le shebe masapo a ka mohla le fetang, hoba tsatsi le leng le tla tsoa mona. ’Me mohla le fallang, le nke masapo a ka le tsamaee le oona.”

<sup>195</sup> Ke lona bao. Lefatše le bue seo le se batlang, le etse seo le se batlang. Ho bokoe Lebitso la Morena. Mpoloke ka ho Kreste, haeba nka bitsoa eng... lehlanya, mohalalei ea thetthehang. Tsatsi le leng O a tla, ’me ba leng ka ho Kreste Molimo o tla ba hlahisa le Eèena, mohla A tlang. Ke ntho ea moea, ’Nete e senotsoeng e robetseng mono, ’me e qosa mohopolo oa oa moea ho E qhautsa. Ako iphomolele holima eona, letšeare lohle. U e nahane. Leha u sa je tinare ea hao, u e nahane.

<sup>196</sup> ’Me bosiung bona, re tlil’o kena Phomolong ea Hae, e sa ntseng e setse, re tle re bone seo pallo ena e leng eona kajeno. Ebe kajeno ntho ee keng? Ha Molimo o sa E tšoara kahara Bibele ena, oa E paka, E mona hona joale, ke tla be ke le moporofeta oa bohata. Ke hantle haholo. Empa E teng mona. Ebe Phomolo ee keng?

<sup>197</sup> O boletse:

Joale, a re tšabeng... hona, haele moo, pallo ea ho  
kena esale teng ho kena joaleka bona,...

<sup>198</sup> ’Me eka khona E be pallo e tšoanang. Eka khona e be phomolo e tšoanang. Eka khona e be Molimo o tšoanang. Eka khona e be lipontšo tse tšoanang. Eka khona e be ntho e le ’ngoe. Empa a re phomoleng. Joale e be Ke eng? Morena a re abele eona, bosiung bona.

Re sa inamisa lihlooho tsa rōna.

<sup>199</sup> Morena ea bokoang, ke Bosafeleng ke bona feela bo tlang ho senola lintho tse kholo tseo hajoale re li arolang ’moho. Nthoana...

Bongata bo teng bo reretsoeng tsuo. Kamoo U boletseng Bukeng ea Juda, ho re, “Batho bao, tsuo ea bona e sang e le khale e ngotsoe, ba fetolang mohau oa Molimo oa rōna bohlola.”

'Me kajeno bongata bo bolela Evangel, mohau oa Molimo, ba O fetola leano le fehlang chelete, ho hlophisa kereke e kholo le sekolo sa Sontaha se fetisang ka boholo, ba nkang mohau oa Molimo oa rōna ba O fetola bohlola. 'Me lefatše le foufetse, le thekesela joaloka likolobe tse foufetseng. Ha ba utloisise.

<sup>200</sup> Oho Molimo, bula kutloisiso ea rōna. Kutloisiso ea rōna e se tšoane le ea bana ba lefatše lena. Hoba U boletse Lentsoeng la Hao, ho re, "Bana ba lefatše lena ba fetisa bana ba Leseli ka bohlale." Tšimolohong ho ne ho le joalo, "bana ba Kaine" ba ile ba fetoha boramahlale ba ba tonana. Ba ile ba fetoha barupelli ba ba tonana. Ba ile ba fetoha batei ba mesebetsi. Ba hatela pele ba atleha, ba ne ba tletse borapeli, empa ba kile ba tsuoa ba noela kahlolong. 'Me litopo tsa bona tsa phaphamala holima metsi, meea ea bona e ile liheleng.

<sup>201</sup> 'Me Jesu o ile ho ea ba bolella, mohla A ne a eshoa. "Le ho ea liheleng ho ea bolella meea e teronkong, e sa kang ea baka mehleng ea mamello, litšiung tsa Nooe," Lengolo le itsalo. 'Me Molimo, mohla A ne a eme holima lefatše, O itse, "Joaloka mehleng ea Nooe, ho tla ba joalo ho tleng ha Mora motho."

<sup>202</sup> Empa rea elelloa, "lesika la Setha mohlang oo," banna ba ithobileng, banna ba Molimo ba sebele, ba sa tsebaeng hakaalo ka lintho tsa lefatše, ba sa natse lintho tsa lefatše ka letho, ba mpa ba lahletse boima bo bong le bong kathoko 'me ba lumela Molimo, ba fetoha baporofeta le banna ba baholo 'Musong. Athe ba bang, lefatše le leng la borapeli, ba ba tšehele, ba ba soma. Empa hora ea fihla mohla meroallo le kahlolo li theohang.

<sup>203</sup> Ho bile joalo le ho tleng ha Jesu Kreste. Kamoo ba tšehele ba ba ba Mo soma, athe borapeli le likereke tsa bona li ne li le kholo. Ba mpa ba soma Naleli ea Meso, 'me ba Mo tšehe. Empa ba kene kahlolong. Eitseha mohla ba balehela ba kena Jerusalema, ke moo ba jeleng e mong bana ba e mong, ba bolaoa ke tlala, 'me mali a bona a kile a phalla a tsoa ka menyako ea literata mohla motse le tempele li ne li chesoa, 'me meea ea bona e kene liheleng.

<sup>204</sup> Morena, ke rōna bana hape, khetlo laboraro. Ena ke nako ea bophelo. Tharo ke palo ea bophelo. 'Me ke rōna bana, re itokiselitse Hloibilo.

Kereke e hatela pele, lefatše le leholo la mahlale. Likereke li lutse li hlohliloe balumeli ba balaelang. Mabitso a mashome a likete a ngotsoe bukeng, e, limilione, athe ba tšehe Evangel, ba bua, ba re, "Ha ba ruteha. Ha ba tsebe letho."

Ekaba ho joalo, Morena, empa se re haellang ka thuto, U se phaelletse ka mohau; ka ho romela Lengeloi la Hao la Leseli, ka ho bonahatsa matla a Hae, ho omela Mantsoe ho bafumanehi le rōna ba sa balang. Empa re U rata ka baka lena, hoba mohau oa Molimo ke oona o sebelitseng hona, 'me rea tseba hore re tsoetsoe. 'Me ehlile ha re ratehe, ho

hang. Re hlile ha re ratehe. Empa Uena, ka mohau, o ile ua re nanabela ka letsoho la Hao le mohau 'me ua tutubolla mahlo a rōna, kamoo le eèna Jesu a re rapeletseng; kamoo Elia a kileng a rapella Gehazi, mohla a ne a sheba a qamaka mathokong a hae. 'Me mahlo a rōna a butsoe kajeno, 'me re bona lintho tsa Molimo, 'me rea tseba hore re tsamaea nakong ea bofelo; mohla matsatsi a Balichaba a seng a batla a felile, 'me O tla ikhethela batho bakeng sa Lebitso la Hae. Re ke re kenyelsetsoe mono, Morena, re rapelisisa ka boikokobetso. Re U rapela ho e aba.

<sup>205</sup> Re hlohonolofatse. Hlohonolofatsa mokhupinyana oona hoseng hona. Ba bopiloe ka mehlahloe e fapaneng ea borapeli le litumelo, empa ako li beelle kathoko kajeno, Molimo. 'Me ba ke ba shalime Kalvari ka kotloloho, ho re, "Molimo, mpopelle u be u mpope. Ke tšoana le..." Moporofeta o ipoletse a theohetsé tlung ea 'mopi oa lipitsa, a tle a pshatluoe a boele a bopelloe. Re bopelle u re bope ka setšoano sa boithatelo ba Molimo. Ho sa tsottelehe haeba re beoa moseme o aloang fatše Tlungs ea Morena. Nka mpa ka beoa moseme oa monyako ho ena le ho aha litenteng le bakhopo. 'Me u e abe, Morena. Re hlohonolofatse feela joale, le ho re baballa re ikokobelitse. Lipelō tsa li bulehe, mehopolo ea rōna e hlakele, lintho tsa Molimo, hoba re e kopa ka Lebitso la Kreste.

<sup>206</sup> Ka lihlooho tsa rōna tse inamisitsoeng, kea ipotsa na o teng motho ea batlang ho hopoloa polelong ea thapelo, bakeng sa poloko ea moea oa hao? Na u ka phahamisa letsoho la hao, 'me u le moetsalibe feela? Molimo a u hlohonolofatse, thaka le lecha. Motho e mong hape? Molimo a u hlohonolofatse, morao mono, monghali. Molimo a u hlohonolofatse, mofumahali. Motho e mong ea batlang ho hopoloa thapeleng hona joale, bakeng sa moea oa hao? Molimo a u hlohonolofatse, monghali, ea phahamisitseng letsoho la hae. 'Me Molimo a u hlohonolofatse, le ueña mona. Ho a babatseha. Ana e mong a ka ba teng, pejana re koala feela? Kea utloa a ka ba teng. Molimo a u hlohonolofatse, morao mono, monghali, ka motšeо.

<sup>207</sup> Ehu, shebang joale, ke batla ho le botsa taba. Ha ke batle ha le e nahana kahobane e le tabernakele ena e nyenyane. Ha ke batle ha le e nahana kahobane e le batho ba eona. 'Me Molimo oa mehauhelo, ho se hopoloe e le kahobane Lengeloi la Morena le nkile setšoantsö sa Lona le 'na, 'me ke...le—le ntho e kang eo, ho etsa hoo. Oho Molimo! Efèla haeba ke ikutloile joalo, ke hona, moena, ke hloka ho namalla aletareng sebakeng sa ho kopa lona. Ke mpa ke bolela sena, ke mpa ke se bua ka Lengolo, le tle le bone hore ena ke 'Nete. Efèla haeba ke E buile, 'me e le ho fela ha eona, ka itšoara joaloka moreri ofe feela kapa ntho efe, kapa ho hong hosele, be, ha ho le joalo, ho tla be ho fapane. Empa le bona lebaka, Molimo o boela a khutla a pota ka koana a e kholisa e le 'Nete. Ua bona? Ke sona

se E nèpahatsang, ke Molimo o E pakang. 'Me hape, ha se hoo feela, empa Lentsoe la Hae le boletse A tla e phethisa. Ke enoa O a e etsa.

<sup>208</sup> Joale ha u sa loka, pelō ea hao e sa loka nqa Molimo, na u ka phahamisa letsoho la hao? Ho re, "Nthapelle." Ho lokile, hona moo u leng teng. Ho phahame matsoho a ka bang robeli kapa a leshome, a batlelang moea oa bona mohau. Le sa inamisitse lihlooho tsa lona, joale le rapele. Hopolang, ke lona ba hlokang ho baka. 'Na ke mpa ke le qella feela, hore Molimo o tle o hauhele. Empa ke eona aletare, Molimo o u behile sebakeng se kahara kelello ea hao; ke eona aletare. Re lumela ho tla aletareng, ehlile, empa hoo ha ho—ha ho... Ho itoketse. Empa aletare ea hao ke moo Molimo a kopaneng le uena. 'Me O kopane le uena hantle moo u lutseng teng. Ke eona aletare ea hao eo.

<sup>209</sup> Joale o re, "Molimo, nkauhele 'na, moetsalibe. 'Me ho tloha letsatsing lena, ha U ka nthusa, ke tla phelela Uena. Ke tla—ke tla U sebeletsa. Ha ke tsotelle seo motho a se buang, kea tsoa, hoseng hona. Ke rapela hantle mona, 'me U falatse moea o saohang oona ka ho 'na. U falatse mabifi ana a ka ho 'na. Kea tseba nke ke ka itšoara joalo ke ntse ke lokile pela Molimo. 'Me lehloeo le ahile pelōng ea ka. Ke na le mona. Ke lonya. Ke na le *sena*, le *sane*. E ntše, Molimo. Ha ke batle ho ba joalo. Nketse mosa, ke ikokobetse, ke be bonolo. Nketse molemo. Nketse motho ea ka U hapelang ba bang. A nke ke U etsetse ho hong ho supa likananelo bophelong ba ka." Thapelo ea hao ke eona eo hona joale, re sa rapela 'moho.

<sup>210</sup> Ntate oa Lehholimo, ke ba Hao. Ke litholoana tsa Molaetsa hoseng hona. Ba phahamisitse letsoho la bona. E teng ntho e ba susumelitseng. Bona, ba hanyelitse molao oa khoheli ka ho phahamisa matsoho a bona. Moea o kahare ho bona o entse qeto. Ba phahamisitse matsoho a bona, hore ba amohetse 'Mopi Ea ba bopileng.

<sup>211</sup> Joale, Ntate oa Lehholimo, ke U rapela ho ba hlohonolofatsa, ba abele Bophelo Bosafeleng, hona joale. Be nka sitoa ho etsa letho; ho ba biletса aletareng, ho ba kenya phaposing e kathoko, ho etsa mosebetsi oohle. Eona, e qosa tšebetso ea Hao, Morena. Re ka sitoa ho etsa letho le fetang ho rera Lentsoe. U boletse, "Tumelo e tla ka kutlo, kutlo ea Lentsoe, Lentsoe la Molimo." Joale, re rerile Lentsoe, 'me ba phahamisitse matsoho a bona, hore ba Le lumetse. Joale ba abele Bophelo ba kamehla, kaha U tšepositse U tla etsa hoo. Efela haeba ba tšepahetse ho phahamisa matsoho a bona, ba tla tsoa moahong oona hoseng hona, ba le mosa, bonolo, e le Mokreste ea ikokobelitseng, kaha U e tšepositse. 'Me Mantsoe a Hao a ke ke a hloleha. Ke e kopa ka Lebitso la Jesu Kreste. Amen.

Joale ke eme, ke letile ke lakatsa,  
Motse oa khanya, Johanne o bone o theoха.

Motseng o khanyang oo, (le ke le rorise joale),  
Motse o bosoeu ba perela,  
Ke sietsoe leaho, harepa le moqhaka;  
Joale ke eme, ke letile ke lakatsa,  
Motse oa khanya, Johanne o bone o theoха.

<sup>212</sup> Ana ha le Mo rate feela? Molaetsa o fetile, joale. Ena ke thoriso. Kerekeng ha re tlele feela ho utloa molaetsa. Re tlela ho roris. Lebala ka moahisane oa hao. Roris Eèna feela. Oh, ho hote hakakang! Ho babatseha hakakang! Ako Mo bolelle ka mokhoa oa hao... Ha u a tlameha ho Mo bolella u hooelelitse. U Mo joetse ka pelöng ea hao feela, "Kea U rata, Morena. Ntšoarele sebe sa ka." Oh, khili!

... Motse o bosoeu ba perela,  
Ke sietsoe leaho, harepa le moqhaka;  
Joale ke eme, ke letile ke lakatsa,  
Motse oa khanya, Johanne o bone o theoха,

<sup>213</sup> Ntata rôna, Molimo, re amohele. Re sa eme, re sa mametse Lentsoe, re hlolohetsoe. "Lipelô tsa rôna li nyoretsoe Uena, joaloka khama ha e tsetselela metsi a molatsoana. Meea ea rôna e nyoretsoe Uena, oho Molimo." Rea lakatsa re emetse, hora eo ea ho hlaha ha Jesu, re shebile hofihlela re memeloa sebakeng. E seng ho ema pel'a Moahloli kahlolong; e se e fetile. Re shoele ka nqa ea lintho tsa lefatše. Re kene ka ho Kreste, 'me eèna O ipelesitse kahlolo ea rôna. Ke 'Muelli oa rôna hona joale, koana setulong sa toka. 'Muelli oa rôna ea bokoang, eo, ka maipolelo a rôna, A qellang nyoea ea rôna hofihlela re itseba re le ba se nang tokelo. Joaloka khaitseli e ratoang e holileng hoseng hona, e pakile ka eona, 'me o ile a nokela lipeni tsa hae, "Haesale ke fihla mona ke ithutile hore Eo hase khalalelo ea ka, ke ka khalalelo ea Molimo."

<sup>214</sup> Ruri, Morena, re ruta batho, re re ha letho le lokileng ho motho, le ntho le e 'ngoe. "Motho ke eng ha U tla mo hlokomela?" Empa re hlahetsoe ke mohau oa Molimo. 'Me re itsepisitse ka mesebetsi ea Hae e inotši, e seng ea rôna. Ebile rea U roris, Molimo o Moholo o Halalelang, ka ho loka ha Hao, ho re kenyellets 'Musong oa Hao o moholo, mananeong a Hao a maholo. Re U amohele lipelöng tsa rôna, ka tumelo. 'Me ka mohau, rea lumela hore U re abetse eona tlotlisong ea Molimo, molemong oa ho sebeletsa Molimo ka eona.

<sup>215</sup> Joale, Morena, folisa bakuli ba tlang ho rapelloa, hoseng hona. Ba fe thabo eo, haele moo ba lakatsa ho fola. Ba ke ba tseba hobane nthoana ena, e leng bohloko bo bobebé bo behiloeng holima bona, bo hlahisitsoe nakoana ea hlahlobo. Molimo o tsebisisa tsohle mabapi le bona. O e sebelitse joalo ho bona seo u tlang ho se etsa ka eona. Kamoo Molimo... Ba

ke ba tsoe mono ba hata 'me ba loanele mosebetsi oo o seng o phethiloe! A Uena...Ba se ke ba U phephetsa, ka ho titimela *mona le mane*, le *kahare le kantle*, "Be, ha ke tsebe *sena, sane*."

<sup>216</sup> Morena, ba ke ba eme tsoe ba tiile, ba ntse ba re, "Morena, ke Uena Ea mpholositseng. Ke Uena Ea nketselitseng lintho tsena. Kea U lumela, 'me kea U tšepa, kajeno." 'Me ke U rapela ho abela batho sena, ka Lebitso la Kreste. Amen.



### BUKA EA BAHEBERU

Melaetsa ena e leshome le motso o le mong ka Moena William Marrion Branham e reriloeng sethatong ka Senyesemane ho tloha ka Phato 21 ho haola ka Loetse 22, 1957, mane Tabernakele ea Branham, e Jeffersonville, Indiana, Amerika, e ntšitsoe mabanteng a likhatiso a makenete 'me e ngotsoe e sa khutsufatsoa ka Senyesemane. Phetolelo ena ea Sesotho sa Boroa e ngotsoe 'me e phatlalatsoa ke ba ha Voice Of God Recordings.

SOUTH SOTHO

©2015 VGR, ALL RIGHTS RESERVED

**VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA**

**VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
www.branham.org**

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)